



जनताना राज

भारत ता कम्युनिस्ट पार्टी (माओवादी) दण्डकारण्य-जोन जनताना सरकार समन्वय कमेटी ता वार्षिक पत्रिका
वर्ष: - 10, अंक-13, मई - 2022, सहयोग - राशि 10 रुपया

1

पीएलजीए २०वीं वर्षगांठ ता विशेषांक



जनयुद्ध-जनसेना मदद ते विकास अत्ता
क्रांतिकारी जनताना सरकार राज्याधिकार

20 साल ता जनयुद्ध—जनसेना मदद ते विकास

अत्ता क्रांतिकारी जनताना राज्याधिकार

दण्डकारण्य ते 25 साल तिना क्रांतिकारी जनताना सरकार निर्माण आसी काम कीयमुंता. क्रांति इत्के राज्यसत्ता ता समस्या इंदना विषय तुन हमेशा सुरता तासना. राजनीतिक अधिकार ता समस्या इत्के अदु, उत्पीड़ित वर्गकु राज्याधिकार कैदे पोयतना. इंजे एवना दुनिया लोपा उचुक देशकुने उत्पीड़ित वर्ग ता जनताना राज्याधिकार निल्पी कीसि ताकी कित्ता. इदु पेरिस कम्युन तिना शुरू आसी सोवियत युनियन, मांगोलिया, चैना, वियतनाम, उत्तर कोरिया, पूर्व जर्मनी, चेकोस्लोवेकिया, पोलैण्ड, रोमानिया, हंगरी, बलगेरिया, क्युबा. काम्बोडिया, लावोस देशकुने मजदूर वर्गम ता राज्याधिकारकु ताकी कित्ताद मंता. मति नेंडु दुनिया

लोपा बेदे देश ते वेंडे सही ता मजदूर वर्ग ता राज्यसत्ता हिल्ले. इद परिस्थिति लोपा मनवा देश ते सीपीआई (माओवादी) नेतृत्व ते क्रांतिकारी



जनताना सरकारकु निर्माण आसी प्रथामिक (बुनियादी) स्तर ते जनताना राज्याधिकार किन ताकी कीयमुंता.

जनताना राज्याधिकार इत्केने सेना, पुलिस, जेलकु इंदना विषयकु वेहतामुंताल. लूटी वर्ग कैदीना अद अधिकार किन उत्पीड़ित वर्ग तमा कैदे पोयतना इत्के ओरा राज्याधिकार किन ध्वस्त कीसि जीड़ा लागिंता. अदु क्रांतिकारी हरदे सफल आंता. दानकिन “जन सेना लेवा जनताकिन बाताये इल्ले” इंजी ‘कामरेड माओ’ स्पष्ट रूप ते वेहतोर. जनसेना मत्केने उत्पीड़ित जनता जनयुद्ध संगे राज्याधिकार किन जीड़ा परदीता. आचरण ते मना कोंडा मुन्ने ताकनाद वेंडे अदे. मना देश ते जाति आधारित सामंतवाद, दलाल नौकारशाह बुर्जुआ वर्ग, ओरा मदद मंदना साम्राज्यवादीर किन हरा कीवा लेवा उत्पीड़ित जनताना राज्याधिकार किन

जीड़ापरवाल. मनवा देश ते 20 साल तिना सीपीआई (माओवादी) नेतृत्व ते राज्याधिकार लक्ष्य ते “जनमुक्ति गेरिल्ला सेना” (पीएलजीए) निर्माण आसि जनयुद्ध तुन ताकिहकीयामुंता. दीर्घकालीन जनयुद्ध हरदे अदु लड़ेमासोरे मंता. पहली ग्रामीण इलाका किन तमा कैदे तासी आखर ते शहर किन, राजधानी किन तमा कैदे तत्तना रणनीति संगे अदु लड़ेमायमुंता. मनवा देश ते रणनीतिक इलाका लोपा ओंदी दण्डकारण्य ते पीएलजीए इल्वा इद 20वीं वर्षगांठ समय ते अलग-अलग स्तर ते नालू वर्गना एकता संगे निर्माण अत्ता जनताना राज्याधिकार संगठन किन अल्सापरवल. दण्डकारण्य गोरिल्ला जोन ते “उड़दानोंके भूमि”,

‘क्रांतिकारी किसान कमेटी किने राज्याधिकार’ नारा संगे शुरू आसी क्रांतिकारी आंदोलन कम समयतेने उच्चस्तर ते क्रांतिकारी जनताना राज्याधिकार संगठन कुना,

निर्माणकु विकास अत्ता. दण्डकारण्य गोरिल्ला बेसकुने निर्माणकु अमल ते वत्ता इत्के अद स्तर ते जनताना राज्याधिकार निर्माण अत्ता इंजी समझेमायना. 1996 ते इवु ग्राम राज्य कमेटीकु मोलका लेक्के शुरू अत्के वेंडे, 2002 एवनेके मजबूत आसी “उड़दानोंके भूमि—क्रांतिकारी जनताना कमेटीकिने पूरा अधिकार” नारा ते क्रांतिकारी जनताना सरकार कमेटीकु निर्माण शुरू अत्ता. 2002–2007 नड़मा अवु विकास आसोरे पंचायती, एरिया, डिविजन स्तर ते निर्माण आसी प्रथामिक स्तर लोपा जनताना राज्याधिकार किन ताकी कीयलाता. इविन क्रांतिकारी जनताना कमेटीकु, लेवोके क्रांतिकारी जनताना सरकारकु (आरपीसी) इंजी जनता वेहतामुंतोर.

इवु क्रांतिकारी जन कमेटी ना विकास जनसेना इल्वा आया परवो. नाटे/पंचायती स्तर तिना जरगता वर्ग संघर्ष संगे इवु निर्माण अत्ता. वर्ग लडाईं पेरसोरे मुन्ने पंचायत स्तर ते, आ पेरके एरिया स्तर ते लूटी वर्गकिना सरकारी विभाग किन ध्वस्त कीसि (निष्क्रिय इत्के काम किवा कितनके) जनताना राज्याधिकार निर्माण अत्ता. मूण्ड एरियाकुने असुंता परिस्थिति वत्तस्के उचुक जागाने डिविजन स्तर ते क्रांतिकारी जनताना राज्याधिकार कमेटीकु निर्माण आसी काम कीयमुंता. पहले नाटेना स्तर ते पीढी-पीढी तिना लूटी सियानलोर रीति-रिवाज पेदिदर ते ताकिकीसोरे मत्ता ओरा अधिकार तुन किसान गोरिल्ला दलमकु ध्वस्त कित्ता कारण ते, उत्पीडित जनताना राज्याधिकार कमेटीकु निर्माण अत्ता. इविन मुट्टी कीयना मैदे लूटी राज्यंत्र बिरिया स्तर तेने प्रत्येक्ष रूप ते आंदोलन इलाका ते डिगता. 2003 ते केंद्रीय अर्ध-सैनिक बलकु (सीआरपीएफ) वत्ता. 18 सालकुने पीएलजीए इव बलकिन मुकाबला कीसोरे जनताना राज्याधिकार किन निल्पी कीयना मैदे जनयुद्ध तुन ताकिकीयामुंता.

2004 ते एरिया स्तर ते निर्माण अत्ता क्रांतिकारी जन कमेटी किन मापना मैदे केंद्र-राज्य सरकारकु ऑड योजना बद्ध तरीका ते अव शासक वर्ग किन विश्वसनीय स्थानीय राजनेता महेंद्रकर्मा किन मुन्ने तासी, स्थानीय सामंतिलोरकिन संगठित कीसि 2005 ते विनाशकारी "सलवा जुडुम" अभियान किन शुरू कित्तोर. मति इदीन 2 दिसम्बर 2000 ते निर्माण आसि 2004 नडमा कम्पनी स्तर ते विकास अत्ता पीएलजीए बलकु, जनता किन नेतृत्व कीसोरे दृढसंकल्प ते मुकाबला कित्ता. ऑड साल लोपा ने सलवा जुडुम किन तोका देहसिता. मति ओना लूटी वर्गनोर हारेमायना तुन मानेमासोरे 2009 नडमा सलवा जुडुम किन जीडिसि बिरिया पैमाना ते "ऑपरेशन ग्रीनहण्ट" किन मुन्ने तत्तोर. तेनु मुकाबला कीसोरने पीएलजीए सैनिक निर्माणकु कम्पनी स्तर तिना बटालियन स्तर एवना विकास अत्ता. अस्केने एरिया तिना डिविजन स्तर ता क्रांतिकारी जनताना सरकारकु विकास अत्ता. लूटी शासक वर्ग जनता पोरो ताकी कीयना अघोषित (युद्ध इंजी केलवा लेवाये जनता पोरो युद्ध कीयनादु) युद्ध किन पीएलजीए दृढसंकल्प ते मंजि, दुश्मन किन गटिंग देब्बा हिंसोरे जनताना राज्याधिकार किन निल्पी कीयना लोपा निर्णयत्मक भूमिका निभा किसोरे मंता. दुश्मन उचुक मौकाने पार्टी किन, पीएलजीए किन बिरिया संख्या ते नुकसान कितके वेंडे, उचुक इलाकाने जनताना राज्याधिकार कमजोर अत्के वेंडे अविन पूरा मापा परवोर अत्तोर. जनताकिन जनसेना इल्वा, जनयुद्ध



लेवा, अविन लोपा क्रियाशील भूमिका लेवा जनताना राज्याधिकार बोरेते वेहता परवाल, आल्सपरवाल, इंदनादु इदु 20 साल ता जनयुद्ध ता अनुभव साबित कियामुंता.

जनताना राज्याधिकार निर्माण ते जनताये मुख्य भूमिका निभा किंता. जनसेना विकास ते वेंडे, जनयुद्ध ताकी कीयना लोपा जनता मुख्य भूमिका किन निभा कीयमुंता. जनता किन जनताना सरकारकु नेतृत्व कीयमुंता. नाटेना लोपा जनमिलिशिया निर्माण, दानकिन ताकी कीयना, जनसेना ते पूना कैडर किन भर्ती कीयना जिम्मेदारी तुन वेंडे जनताना सरकारकु एतामुंता. आल्सता लक्ष्य अनुसार हर साल भर्ती अभियानकुन सफल कीयना लोपा जनताना सरकारकु मुख्य भूमिका निभा कीयमुंता. पूना भर्ती संगेने सैनिक निर्माणकुन विस्तार कीयना, विकास कीयना ताकामुंता. नाटेना बुनियादी स्तर तिना ओरा संगे जनविरोधीलोरकिन सजा हियना, जनताना राज्याधिकार बचा कीयना, वर्ग संघर्ष किन ताकी कीयना लोपा जनताना सरकार कमेटीउ जनसंगठनकुना निर्माणक संगे समन्वय ते मंजोरे काम कीयमुंता. नालू दशाब्दी किन पोरोये क्रांतिकारी आंदोलन ते तमक लडेमासी हासिल कित्ता सफलता किन निल्पी कीयना इत्के पीएलजीए मजबूत ते मंदना इंजी, अदु मजबूत मंदना इत्के स्थानीय लेय्या-लेय्योर किन भर्ती कीयना. ओर किन पीएलजीए लोपा भर्ती कीयना जिम्मेदार मावादे इंजी जनताना सरकारकु हर साल भर्ती अभियान टारगेट तासी जनता लोपा राजनीतिक प्रचार कीसि पीएलजीए ते लेय्या-लेय्योर किन भर्ती कीसि तमा परिवार किन जरूरत मंदना मदद हियना मैदे जिम्मेदारी एतामुंता. इचुने आयवा, क्रांतिकारी आंदोलन ते दुश्मन संगे लडेमासी शहीद अत्ता परिवार किन हिम्मत वेहसोर ओरा परिवार किन मदद हियमुंता.

पीएलजीए ते भर्ती आसी जनता मैदे लडेमायना लेख्या-लेख्योर, लोता मैदे आल्सवा लेवा तमा मैदे लडेमायना पीएलजीए किन जनताना सरकारक प्रोत्साहन हियमुंता.

क्रांतकारी जनताना सरकारकु जनताना जरूरत किन पूरा कीयना मैदे तमाकु परतचोन कोशिश कीयमुंता. सैनिक बलकुना कैंपेइन नडमा जनताना सहकरी टीम किन ताकी कीयना मैदे नाटे बुनियादी बल तिना (जनमिलिशिया) अद एरिया ते मंदना मेन फोर्स एवना जनताना रक्षण जिम्मेदारी एतामुंता. जनवरी-फरवरी महीना ते भूमि समतलीकरण, डोबरी सिंचाई तैयार कीयना कैंपेइन ताकना समय ते अव कामकिने सुरक्षा जिम्मेदारी निभा कीयमुंता. जनता ईडु पेहकना समय ते (अपैल) ओर किन सुरक्षा मंदांमुंतोर. मई महीना ते तुमिर आकी कोयना सीजन ते पीएलजीए जनताना रक्षण मैदे एंगेज आस मंता. दाना पेरके खेती काम समयते पीएलजीए दुश्मन बलकु वायना तुन जांच कीसोरे, जनता किन सुरक्षा मंदना इंजी खबर एवसी कीयमुंता. जनता, जनताना सरकारकुन सुरक्षा जिम्मेदारी मावादे इंजी पीएलजीए काम कीयमुंता. ताना मदद ते जनता तमा काम कुन पूरा कीयमुंतोर. जनताना सरकार कमेटीउ ताकी कीयना सामूहिक काम-कज तुन लोक निर्माण, गल्ली रोड निर्माण, पुलिया निर्माण, खेती काम ते शामिल आयना समय ते

पीएलजीए रक्षण जिम्मेदारी संगे काम लोपा शामिल आयमुंता. तमा सुरक्षा जिम्मेदारी तुन हूडाना पीएलजीए ता तिंदना-उंडना

जरूरत किन जनताना सरकारकु जिम्मेदारी एती पूरा कीयमुंता. टीसीओसी, प्रतिरोध समय ते

पीएलजीए ता युद्ध सामग्री किन कांजाना, युद्ध ते घायल अत्ता कॉमरेड लोरकिन इलाज मैदे सुरक्षित जगह ते देखभाल कीयाना, शहीद कॉमरेडलोरा अंतिम संस्कार ते शामिल आयाना, पीएलजीए मैदे जरूरत ता सामग्री किन संग्रहित कीयाना लोपा जनताना सरकारकुना नरगे योगदान मिंदे. इद हिसाब ते जनताना सरकारकु, पीएलजीए नडमा सुरक्षा, भर्ती, युद्ध, पोषण ई लेहका सब्बे विषयकुने जिम्मेदारीपूर्वक



समन्वय ताकामुंता. पीएलजीए तमाकिन जरूरत मंदना युद्ध सामग्री किन तैयार कीयनास्के जनता तिना दोरकना विस्फोटक किन जमा कीयनगडल शुरु कीसि सुरक्षा, मेहनत ते शामिल आयमुंता. वेंडे सप्लाई ता काम मतस्के तच्ची हियना जिम्मेदारी तुन, युद्ध चला कीयना जिम्मेदारी समनवय ते ताकी कीयमुंता. आखिर ते दुश्मन पोरो पीएलजीए हमला कीयना समय ते सशस्त्र बलकु युद्ध लोपा शामिल आसोरे, बाकी जनता तिंदना-उंडना तिना शुरु कीसि घायल अत्ता कामरेड किन अद जागा तिना ओयना, दुश्मन तिना जप्त सैनिक सामग्री किन सुरक्षित जागा ते ओयना लोपा जनता शामिल आयमुंतोर. बेदे किवोम इंदनाद मनो. इद हिसाब जनयुद्ध ते जनताना क्रियाशील भूमिका वडसातके पेरसोरे मंता. इदु जनयुद्ध ता स्वाभाव किन चिन्हा लेक्का मंता. पीएलजीए, जनता ना सुरक्षा ते मंजोरने बेगडा-अगाये जनताना सरकारकु गरें मंजी जनता किन मार्गदर्शन हियमुंता.

इद जंगल मावादे इंदाना न्यायपूर्ण विचार मूलवासी जनता लोपा मजबूत ते मंता. ओरकिन इद जंगले सबे रकमता बचा कीता, इंदना विषय निज्जमतदु. अदेन मैदे ओरु जल-जंगल-जमीन-अधिकार मावादे इंदना विचार ते तान किन हासिल कीयना लक्ष्य ते, दृढसंकल्प ते लडेमायमुंतोर. जनताना सरकारकु निर्माण आसी ताकना

समय तेने केंद्र सरकार पेसा कानून किन बना कित्ता. अद कानून सबे नाटेने, बूण्डा/पारा ते 18 साल उम्र तोरा संगे बनेमात्ता 'ग्राम सभाकु' तमा जंगल पोरो तमाके अधिकार मंदाना इंजी वेहत्ता. इद कानून अमल कीयना इंजी जनता मिलटेंट

आंदोलन कीयमुंतोर. लुटेरी सरकार ता लक्ष्य अलग मत्तेकाई जंगल तुन नुकसान आयवा बचा कीयना, जंगल ते मंदना अनमोल प्राकृतिक वेंडे वन संसाधन किन दलाल नौकरशाही पूंजीपतिलोर लूटी किवो अविन बचा कीसि देश ता जनता किन उपयोग कीयना इत्के वन संपत्ति किन लूटी कीसि ओयना सम्राज्यवादीर, दलाल नौकरशाही पूंजीपतिलोरा लूटी खिलाफ ते लडेमायना चेतना संगे जनताना सरकारकु काम

कीयामुंता. प्राकृतिक संसाधन मैदे, देश ता पर्यावरण मैदे, स्थानीय जनताना जरूरत किन उपयोग आयना मैदे पीएलजीए मुन्ने निच्ची दृढसंकल्प ते लडेमायामुंता. पहले किसान गेरिल्ला दलकु, ताना पेरके पीएलजीए हिल्वा इवु 40 साल किन पोरोये अनमोल प्राकृति संसाधन जनता किन दोरकानावयो.

दुनिया मेंडु उडतके, मनवा देश ते वेंडे आर्थिक, राजनीतिक संकट वर्षत्के पेरसामुंता. लूटी शासक वर्गतोर संकट तिना बहार वायना मैदे लूटी किन नरगे पेरसी कित्तोर. मति ओर किन दूसरा हरी हिल्ले. ओरू लाखो संख्या ते सुरक्षा बलकुन तासी मनवा जंगल ते मंदना संसाधन किन लूटी कीसि ओयला कोशिश कीयामुंतोर, ओयामुंतोर. इवु लूटी कीसि ओयनादु बेचोन लेट अत्के अचोन ओरा संकट पेरसीता. अदिन मैदे ओरू संसाधन किन ओयना मैदे जल्दबाजी आंतोर. ओरा लूटी किन क्रांतिकारी जनता रोमी कीयामुंतोर. ओरकिन माओवादी पार्टी, क्रांतिकारी जनसंगठनकु, जनताना सरकारकु नेतृत्व कीयामुंता. इव सबेकिन पीएलजीए बलकु सशस्त्र सुरक्षा हियमुंता. नेंड गोरिल्ला बेसकुने बनेमात्ता जनताना सरकारकु देश ता उत्पीडित जनता ना मैदे वियुक्कासि तोंदामुंता. लुटेरी सरकारकुना विकल्प ते असली विकास नमूना संगे इवु जनताना सरकारकु उत्पीडित जनता मुन्ने पूना हरी तासमुंता. दान मैदे लूटी तोर इवु सरकारकुन मापाना मैदे, संसाधन किन ओयनोंकु अड्डम मंदना क्रांतिकारी आंदोलन किन पूरा खत्म कीयना इंजी केंद्र-राज्य सरकारकु उबय-उबय हमला कीयामुंता. अदिन मैदे जंगल इलाकाने कॉरपेट सेक्युरिटी पेरसी कीयामुंतोर. प्रहार हमला कैंपेइन पेदिदर ते जंगल ते नेतुर पोगिंकीयामुंतोर. मति मनवा जनता लडेमायना मैदे पेरके गुच्चवा लेवा ओरा गति किन, धोखा किन शिकार आयवा, दुश्मन किन अभेद्य तरीका ते संगठित कीसोरे, जनताना सरकारकुन बचा कीसोरे विस्तार कीयना नेटा मनवा मुख्य कर्तव्य. अदिन मैदे मनवा पीएलजीए किन मना कौंडा मिंडडी लेक्का बचा कीयना.

देश लोपा अधिकार ते मंदना ब्राह्मणीय हिन्दुत्व फासिवादीर भारत ता कम्युनिस्ट पार्टी (माओवादी)

किन, तना नेतृत्व किन, क्रांतिकारी आंदोलन किन मोदोल मड्डा तिना खत्म कीयना इंजी आल्समुंता. मना आरपीसी कुना पोरो केंद्रीकरण कीसि हमला कीयामुंता. अलग-अलग पद्धति ते, रूपते मनवा जनताना सरकार नेतृत्व किन खत्म कीयाना मैदे पुलिस षडयतंत्रकारी योजनाकउ बना कीसि अमल कीयामुंता. 2021 मई ते गडचिरोली भामरागढ एरिया ते जनताना सरकार अध्यक्ष किन पुलिसतोर मदद ते गुण्डालोर हत्या कित्तोर. बीजापुर जिला गंगोल एरिया आरपीसी अध्यक्ष मंगू दक्षिण बस्तर डिविजन ते हिडमाल किन, दरभा ते आरपीसी अध्यक्ष गुडडी किन पुलिस तोर फर्जी मुठभेड ते हत्या कित्तोर. ई लेहकटा हाउकता घटनाउ नरगे मिंदे. इसुंताव हमला नाडी इंका पेरसीता. आलकेने मनवा जनताना सरकार पोरो बुर्जुवा सरकार प्रतिबंध तासता कारण ते पेरसना फासिवादी हमला नडमा अवु मुन्नेटा लेक्का काम कीया परवो आयामुंता. अविना काम-काज गुप्त रूपते मंदना. दुश्मन चिन्हित कीया परवा गुप्त रूपते नाटेना जनताना सरकारकु काम कीयना. बेद काम तुन वेंडे रोमी किवा, नुकसान आयवा लेवा ताकना लेक्का मनवा जनताना सरकारकु ऊडना. अदिन मैदे मनवा पीएलजीए मदद ज्यादा जरूरत मंता. पीएलजीए, जनताना सरकारकु मुन्नेटकाई ज्यादा समन्वय संगे काम कीयना जरूरत मंता. क्रांतिकारी सुधार योजनाउ मुन्नेटकाई ज्यादा, गुप्त रूपते अमल कीयना. जनता क्रियाशील ते भाग एतना पेरसत्केने अदु सफल आंता. जनताना सरकारकु, कार्यकर्तालोर जनता किन मुन्नेटकाई ज्यादा गरें मंजी जनता लोपा काल्थि-मिलिय काम कीयना. मति जनविरोधीलोर, गड्डालोरकिन समझेमायवा गुप्त रूपते काम ताकना. क्रांतिकारी काम-काज किन अड्डम वायना जनविरोधलोरकिन ओरा गलत तुन ऊडी जनदिशा-वर्गदिशा हिसाब ते जनताना सरकारकुना न्याय शाखा ताकिकीयाना जनदालत ते सजा हियना लोपा पीएलजीए मुन्ने मंजी पहल कदमी एतना. इद समय ते रेंडीन नडमा वेंडे एकता, समन्वय विचारधारा काम-काज ता एकता पेरसी कीयना. ☉

“पार्टी मनवा देश ते मुण्ड बिरिया मेट्टा किन तहकी एसी नवजनवादी क्रांति किन सफल कीयना मैदे देश ता ठोस परिस्थिति अनुसार दीर्घकालीन जनयुद्ध हरी किन उपयोग कीसोरे सफलता हासिल किंता. तेना लोपा मुख्य हिसाब ते 20 साल तिना पीएलजीए ता विशेष भूमिका मिंदे. पार्टी बदलेमायना परिस्थिति अनुसार कार्यनीति, कार्यपद्धति, पॉलिसि किन विकसित कीसि अचारण लोपा डिगता. भाकपा (माओवादी) ता आविर्भाव संगे आंदोलन ते हासिल किता अनुकूल विषयकुना आधार ते तीन जादुइ हथियार-पार्टी, जन सेना, संयुक्त मोर्चा किन मजबूत कीयना प्रयास ताकता.”

जन संघर्ष-जनयुद्ध

हत्त रेंड सालकुनल छत्तीसगढ़, झारखंड, ओडिशा, तेलंगाना, आंध्र प्रदेश ता आदिवासी इलाकाने जल-जंगल-जमीन-इज्जत-अधिकार मैदे आदिवासी जनता जन आंदोलनकु लोपा वेल्लाय संख्या ते तेदामुंतोर. जन संघर्षकु वेल्लाय, विस्तार ते बेरस्तादु मनल ऊडमुंताल. ब्राह्मणीय हिंदुत्व फासीवादी भाजपा सरकार लागू कीयना 'समाधान'-प्रहार सैनिक अभियान अंतर्गत जगह-जगह वाटाना पूना पुलिस कैपकुना, खदानकुना, रेल लाइन, बांधकुना खिलाफ ते व्यापक, जुझारू जन आंदोलनकु ताकामुंता. समाधान योजना हिसाब ते ताकाना प्रहार हमलाउ किन हरा कीयना इतेके मावा जनताना सरकारकु इव जन संघर्ष पोरो केंद्रीकरण कीयाना, अविन विस्तार, मजबूत कीयलासि जरूर कोशिश कीयाना.

मनवा पार्टी कार्यक्रम ता 32वी पाइंट ते, तीसरा विषय ईले मंता -'सर्वहारा वर्ग नेतृत्व ते किसान, मजदूर ना गोती पोरो, जनताना जनवादी क्रांति ता साधारण कार्यक्रम पोरो आधार आसि क्रान्तिकारी वर्ग



ता संयुक्त मोर्चा बनेमांता. हथियारबंद संघर्ष मुन्ने दायना इत्के, जन संघर्ष-सशस्त्र संघर्ष संगे राज्य सत्ता तुन हसिल कियना मैदे इव सब्बे संयुक्त मोर्चाकु ना जरूरत मंता.

संयुक्त मोर्चा इतेके, सबे क्रांतिकारी वर्गम ता जनता किन ओंड कट्ट कीयाना संगठनकु. मजदूर वर्गम ता नेतृत्व ते चार वर्गम ता जनता ना रणनीतिक संयुक्त मोर्चा इत्के दंडकारण्य ते क्रांतिकारी जनताना सरकार, झारखंड ते क्रांतिकारी किसान कमेटी. आल्केने कार्यनीतिक संयुक्त मोर्चा संगठनकु इत्के सब्बे रकम ता (गुप्त ओसे खुला) जन संगठनकु - गोरिल्ला जोन

ते, स्पेशल एरिया ते मंदना जन संगठनकु, वेंडे मैदान इलाका ते, शहर इलाका ते मंदना जन संगठनकु इंजि समझेमायना. जन युद्ध ताकना गोरिल्ला जोनकुने मनल नरगे ध्यान ईसि जन संघर्षकुन बेरिसि कीयना जरूरत मंता. इंजे देश लोपा मंदना गोरिल्ला जोनकुना लोपा, मैदान, शहर इलाका लोपा ताकना जन संघर्षकुना बारेते पुंदाकाल.

दण्डकारण्य स्पेशल गोरिल्ला जोन ते उत्तर, दक्षिण, पश्चिम ब्यूरोंग लोपा, बिहार-झारखण्ड स्पेशल एरिया लोपा जनता नेंड मुख्य रूप ते राज्य दमन ता खिलाफ ते नरगे हिम्मत ते लडेमाय मंतोर. देश ता प्राकृतिक संपत्ति तुन साम्राज्यवादीर लुटी किसी ओयनोकि मनवा देश ता दलाल नौकरशाही पुंजिपतीर, सामंतवादीर कुन माओवादी जन युद्ध अड्डम मंता. अदेनके इद 2022 एवनल माओवादी पार्टी किन, जन मुक्ति छापामार सेना (पीएलजीए) तुन, क्रांतिकारी जनताना सरकार, क्रांतिकारी किसान कमेटी तुन, क्रांतिकारी जन संगठन कुन मापना इंजि केंद्र, राज्य सरकारकु योजना

पण्डिसि, रंग रंगिना तरीका ते जनता पोरो, पार्टी, सेना, संयुक्त मोर्चाता नेतृत्व, कार्यकर्तालोरा पोरो हमला बेरिसि कीयमुंता. जनता लोपा राजनीतिक काम ताकनायो, जनता जन युद्ध लोपा शामिल आयनायो इंजी सुकलीतोर किन तैयार कियमुंता, मनवा काम-काज पोरो कोण्डा वाटमुंता. कार्पेट सेक्युरिटी पेरिसिकीसोरे, मावा इलाका तुन सीमित कीयालासि गरे गरे पुलीस केम्पी तत्तामुंतोर. इव पुलीस केम्प वापस दायना इंजि

जनता लढेमाय मुंतोर. अत्ता रेंड साल लोपा कडियमेट्टा, पोटाली, चीकपाल, करकाघाट, तुम्मिरघाट, पुसनार, (पूंबड), करेगुडेम, नहोड, एलाड, पूसगुप्पा, वेच्चाघाट, वेच्चापाल वेण्डे अलग अलग जागा ने पुलिस केम्प विरोधी संघर्षकु तका मंता.

कार्पेट सेक्युरिटी तुन बेरिसि कीसोरे, पूना केम्पकु वाटनस्के, बेगेता अगा जन संघर्षकु चालू अत्ता. 2021 मई 13 तारीख ते डीके ते दक्षिण बस्तर डिवीजन ते सिलिंगेर नाटे वत्ता केम्प ता विरोध ते चालू अत्ता जन आंदोलन, संघर्ष कुन पूना स्फूर्ति ईत्ता. इद संघर्ष तुक

देश तिनए अईवा अलग अलग देश तल मदद दोरकता. जनता तमवा कमाई, लोन विडिसि इद संघर्ष लोपा इंजे वेण्डे दिनाले शामिल आयमुंतोर. केम्प वत्तेके तमवा बतकड तिप्पल ते अर्रिता इंजि पुंजि जनता रोमवालेवा हत्ता करीब साल मेंड तल संघर्ष तुन ताकी कीयमुंतोर. सिलिंगेर कार्यकर्तालोरा संगे राज्य मुख्यमंत्रि वीडियो कान्फरेन्स ते बातचीत कीत्तोर. पैसा गावालेया, नैकरी गावाला इंजि मुख्यमंत्रि तालकतस्के, जनताना नेतालोरा सिलिंगेर नाटे पुलिस केम्प टेण्डतेके आंता इंजि उंदि माटा केत्तोर.

इंजे दक्षिण बस्तर ते सिलिंगेर, गोमपाड, सिंगारम, एम्पुरम, धर्मारम, नहोडी, पूसनार, एल्मागोण्डा, रामपुराम नमीदार, वेच्चापाल ईले पूरा 11, 12 नाकुने, वेंडे उत्तर बस्तर ते वेच्चाघाट ते सैकडों नाहकुना जनता हजारों संख्या ते धरना-प्रदर्शन कीयमुंतोर। जनता प्रदर्शन कीयना जागा ते नेंगुता/ओडित्ता पुलीसीर किन ऊडि ऑंग/अल्लम अत्ता वेरौर मुइत्तोर, वेरौर पुलीस किन पोइसि 'बार वत्तीन, माटु उदता जागा ते?' इंजि मुण्डाड कीत्तोर. पुलीस अधिकारी वासि गलती ओपतस्केने मुइत्तोर ओन किन विडस्तोर. ईले जनता पुलीसीर किन सुडन वेंडें वेरियवालेवा संघर्ष कीयमुंतोर. दक्षिण सब जोन ते पश्चिम बस्तर, दर्भा डिवीजन ते

इंजेकु तीन लेंज तिना लगातार संघर्ष कीयमुंतोर. पुर्व बस्तर ते आमदाई पहाड़ किन बचाकीयाना मैदे, खदान खिलाफ ते इत्के विस्थापन विरोध ते जनता जुझारू आंदोलन कियमुंतोर. आल्केने माड़ डिवीजन ते राज्य सरकार पुना पोलिस केम्प तत्ताना तैयारी कीयना मूंदी, कच्चापाल, गारपा ईले अलग अलग नाहकुने जनता संघर्ष कीयमुंतोर.

बिहार-झारखण्ड स्पेशल एरिया ते अत्ता रेंड साल तिना पुलिस कैम्प विरोध ते संघर्षकु बेरस्ता. झारखण्ड राज्य ते गोइलकेरा जिला ते कुइडा नाटे स्कूल लोपा 'इंडियन रिजर्व बेटालियन' (आइआरबी) केम्प तत्तोर. तमक मुन्ने वेहवालेवा, तमवा (ग्रम सभा) अनुमति एतवाए ईले अचानक वत्ता केम्प ता खिलाफ ते जनता नरगे ओंगु अत्तोर. इद केम्प मत्के मवा पिल्ला, पेकोरा पढाई जुविकंता इंजि, तमवा नाटे पुलीस केम्प तुन वापस ओयना इंजि 'मुण्डा संघ संगठन', इंदना पेद्विर ते गोइलकेरा क्षेत्रीय कमेटी नेतृत्व ते जनता संघर्ष शुरु कीत्तोर.

चक्रधरपुर ब्लाक ते पैदमपुर सरने मंदना नाहकुना जनता पैदमपुर ते वत्ता पूना पुलीस केम्प खिलाफ ते संघर्ष चालू कीत्तोर. गिरिडीह जिला पीरठाण्ड ब्लाक ते पारसनाथ ब्लाक ते पाण्डेयडीह-पर्वतपुर नाहकुना

वेचाघाट मे अनिश्चितकालीन आंदोलन शुरू



नहोडी ते महिला ना प्रतिरोध



छोटेबेटिया में नया पुलिस कैंपों के खिलाफ



वेच्चापाल में जनप्रतिरोध



सिलिंगेर जनप्रतिरोध



पुलिस कैम्प वाटनादु समझोमत्तस्के जनता उब्बाये संघर्ष चालू कीयमुंतोर.

उत्तर सब जोन ता उत्तर बस्तर डिवीजन ते वेच्चाघाट तगा मेण्डकी कुयेर पोरो पुलिया दोहनायो इंजि, छोटे बेटिया ते बीएसएफ केम्प तत्तानायो, परालकोट ते पर्याटक केंद्र वायनायो इंजि जनता

नडमा सीआरपीएफ कैम्प तत्ताना लूटी सरकार ता कोशिश तुन जनता विरोध कीयमुंतोर. तमवा मांग तुन मानेमायवद ऊडि मंजि वेण्डे 10 दिया पेरके अंजि केम्प मुन्ने वाटता वेल्लुम (फिनसिंग) तार तुन देहतोर. 12 मोटार साइकिलकु, उंदि जेसीबी मिशन, जेनरेटर, एर ओयना गोटटा, वायरिंग कुन ध्वस्त कीत्तोर. मति लूटी

सरकार जनताना मांग कुन आल्सवालेवा ईले कीत्ता जनता पोरो केस वाटमुंता. इदे जिला ते कलहाबर नाटे कालेज पेदेर ते पुलीस केम्प तत्ताला तैयारी ते मत्तस्के अदिन पीएलजीए मदत ते जनता हमला किसी अद काम ते मत्ता जेसीबी मिक्सर मिशन कुन ध्वस्त कीत्तोर.

झारखंड ता पश्चिम सिंगभूम जिला ते सोनुवा पुलीस स्टेशन तिना पुलिसतोर गस्ती अंजि केडाबीर नाटे वेरोन दादान अरेस्टु कित्तस्के, कराइकेला इलाका ते रंजडाकोचा नाटेना जनता तुरंते थाना तगा अंजि पुलिसतोर पोइसि ओत्ता मानेय किन विडसना इंजि जनता लढेमत्तोर.

इव जन संघर्ष ते वत्ता मुख्य मांगकु इत्के-केम्प तत्ताना, पुलीसतोर नाकुनागा वासि जनता कुन पोइसि ओयना, लोकिन बोडसना तुन बंद कीयना. महिला किन अत्याचार-हत्या कीयना, झुठी मुठभेड ते नरसंहार कियना बंद कियना. इंजे एवना ताकि कीत्ता नरसंहार किना न्यायिक जांच कीसि जिम्मेदारी पुलिस अधिकारीर किन सजा ईयना. लूटी सरकार ता 'पेसा कानून' इसाब ते ऊडतेके इव सब्बे कानून आदीवासी जतना विरोधी कामे आन्ता. पेसा कानून इसाब ते ग्रामसभा तुन वेहवालेवा नाटे बेदाई काम कीयनायो. मीट पण्डता/बनेकिता कानून कुन मीटे लागू कीवीर इंजो जनता केंद्र, राज्य सरकार कुन प्रश्ना वाटमुंतोर. कानून इसाब ते तमवा नाटे उण्डाना एर, हास्पतल, स्कूल तत्ताना इंजि मांग कीयमुंतोर. वनोपाज पोरो जनता किन कानून ईत्ता हक कुन लागू कीयना इंजि मांग कीयमुंतोर.

मैदान, शहर इलाका लोपा ऊडतेके, हर चीज ता मोला बेरसना, जनता पण्डी किता पण्टा किन समर्थन मुख्य दोरकना इंजी, बेरोजगारी, गरीबी ता खिलाफ ते रोजमर्रा समस्या किन पोहिसी जनता संघर्ष ता हरिं पोइतमुंतोर. केंद्र, राज्य सरकारकु तत्ताना जन विरोधी कानून कुना खिलाफ ते मजदूर, किसान, कर्मचारी,

गुरूजी, छात्रा,व्यापारी ईले अलग, अलग सेक्शनकुना जनता बेगे ता अगाये संघर्षकु कीय मंतोर.

2021 जनवरी ते मावा केंद्रीय कमेटी पेसी कीत्ता 'राजनीतिक प्रस्ताव' अनुसार-

'देश मेटा विकसित आसोरे मत्ता जन संघर्षकुन क्रांतिकारी संघर्ष ऊसा लेक्का मिडतकाल' - देश ते उदि पक्का साम्राज्यवाद, दलाल नौकरशाही पुंजिपति, सामंतवादी वर्गकुना शोषण, उत्पीडन बेरसामुंता. दूसरा पक्का उत्पीडित वर्गकु, उत्पीडित सामाजिक समुदायकु, उत्पीडित राष्ट्रीयताउना जनताना संघर्षकु तेज आयमुंता. इद परिस्थिति लोपा मजदूर वर्ग, किसान वर्ग, छात्र, नवजवान, राष्ट्रीय बुर्जुवा वर्ग, महिला, दलित, आदिवासीर सामना कीयना रोजमर्रा बतकड ता समस्यांग पोरो, ओरा बतकड लोपा बुनियादी (ज्वलंत) समस्यांग ना पोरो, स्थानीय स्तर तिना, केंद्रीय स्तर एवनल विस्तृत, जुझारू जनसंघर्षकु ताकी कीयना.

इद इसाब ते मनल जनतना बतकड ते सामना कीयना तिप्पल तुन मापला, जनता किन संगठित कीसि संघर्षकु चेला कीयना. मैदान इलाका, शहर इलाका ते मंदना मजदूर, किसान, पेटीबुर्जुवा, दलित, आदिवासी जनता, राष्ट्रीय पूंजीपतीरा लोपा काम कीसोरे, ओरा राजनीतिक चेतना पेरसी कीसि मजबूत कियना. नवजनवादी क्रांति ता हरींदे मजदूर, किसान, पेटी बुर्जुवा, राष्ट्रीय बुर्जुवा वर्गकुन एकता कीसि सर्वहारा वर्ग ता नेतृत्व ते जनताना (वैकल्पिक) राज्याधिकार तुन पंडना. देश ते नरगे मुल किसानलोर मंतोर. इद देश ते 'पूहतानोर किन नेली' मुख्यता कार्यक्रम मंदना. अदिन मैदे जन आदोलनकिन, गोरिल्ला जनयुद्ध तुन तेज कीसोरे नव जनवादी क्रांति तुन सफल कीयना. नालुंग वर्गम ता जनता ना रज्यसत्ता तुन निल्पी कियना. ⊙

सभी जन आंदोलनों में हमें सक्रिय समर्थकों, विरोधियों और तटस्थ व्यक्तियों की संख्या की बुनियादी जांच-पड़ताल कर लेनी चाहिए और उसका बुनियादी विश्लेषण कर लेना चाहिए तथा समस्याओं का फैसला मनोगत ढंग से और बिना किसी आधार के हरगिज नहीं करना चाहिए.

(“पार्टी कमेटियों के काम करने के तरीके”, १३ मार्च, १९४९, संकलित रचनाएं, ग्रंथ-४, पृष्ठ ३८०, अंग्रेजी संस्करण)

दण्डकारण्य ते क्रांतिकारी जनताना सरकारकु ताकिकीत्ता 10 साल ता

भूमि समतलीकरण अभियान किन सफल कित्ता जनताना सरकार नेतलोरकिन,

कार्यकर्तलोरकिन, क्रांतिकारी जनता किन क्रांतिकारी जय-जयकार!

जीवाता कॉमरेड्स, जनता!

भूमकाल जोहार,

मावा क्रांतिकारी जनता दुश्मन संगे लडेमासोरे जनयुद्ध ते कुरबानी हीसोरे क्रांतिकारी जनताना सरकार किन निर्माण कीसि, मजबूत कीसोरे जनताना राज्याधिकार किन निल्यी कीयमुंता. वैकल्पिक, राजनीतिक, सांस्कृतिक, आर्थिक बदलाव संगे जनताना स्वावलंबी आर्थिक व्यवस्था किन मजबूत कीयना खासकर जनताना कृषि उत्पादन किन पेरसिकीयाना लक्ष्य ते जोन जनताना सरकार समन्वय कमेटी मार्गदर्शन ते हत्ता 2011 तिना इत्के 10 सालकुन पोरो भूमि समतलीकरण अभियान चला कित्ता. भूमि समतलीकरण कीयना जनता पोरो दुश्मना कीयना हमला निंची बचा कीयना मैदे पीएलजीए विशेषकर मिलिशिया बिडिया संख्या ते एंगेज आसि सुरक्षा हित्ता. लुटेरी सरकार ता फोर्स इद् अभियान तुन विफल कीयना मैदे समतलीकरण काम कीयना जनता पोरो फायरिंग कीसि फर्जी मुठभेड ते उच्चुन मुल नेतालोर, कार्यकर्ता लोरकिन वेंडे साधारण जनता किन हत्या कित्ता. नरगे मूल किन अरेस्ट कीसि झूठा केस वाटी जेल वाटतोर. उचुक इलाका ने दुश्मन मीकिन सरकार ट्रॅक्टर संगे उडसीतोर गुप्पालोर मीकिन पैसा इवोर, वर्राट' इंजी गत्ति कीत्तोर. मति जनता ओंदी कट्ट आसी दुश्मन ना गत्ति तुन विफल कीसोरे इद् अभियान तुन हिम्मत, दृढसंकल्प संगे ताकिकीत्ता. मति जनता दुश्मन संगे लडेमासोरे काम तुन रोमी किवा लेवा हर साल 20-30 दिया एवना 10 साल भूमि समतलीकरण अभियान ताकी कित्ताद मिंदे. ओंड पक्का दुश्मन संगे लडेमासोरे, जीवा हीसोरे, जेल अत्के वेंडे तमा उत्पादन किन पेरसी कीयना मैदे मेहनत संगे 'स्वावलंबी आर्थिक व्यवस्था' किन विकास कीयना काम ते नेतृत्व कित्ता जनताना सरकार किन, शामिल अत्ता क्रांतिकारी जनता, जनता किन सुरक्षा कित्ता पीएलजीए ता मूंड बल किन विशेषकर मिलिशिया किन जोन क्रांतिकारी जनताना सरकार समन्वय कमेटी

क्रांतिकारी अभिनंदन संगे जय-जयकार वेंडे भूमकाल जोहार-लाल सलाम् वेहता मुता.

भूमि समतलीकरण अभियान ते जनदिशा-वर्गदिशा किन अमल कीसोरे मुन्ने ग्रीनहण्ट आपरेशन, आ पेरके समाधान-प्रहार हमला ना नडमाने हर साल 250 तिना 300 पंचायत स्तर ता आरपीसीऊ, सैकडों नाहकुना जनता इद् अभियान ते शामिल अत्ता. लेका पूरा वावेकाई इवु आइवा पुलिस कैंप, थाना मंदना जनता वेंडे समीष्टि काम ताकिकीत्ता. गरीब परिवार-16,349, मध्यम परिवार-9,631, धन्नी किसान परिवार-1,271, शहीद परिवार-730, जेल परिवार-1,698, पीएलजीए परिवार, रान्डी-सूण्डी परिवार 1,978 किन, ओसो भूमि इल्वा गरीब जनता किन जन विरोधी लोरा जप्त कित्ता भूमि, जंगल/बंजर भूमि इद् समय ते करीब 300-400 एकड़ भूमि हीसि समतलीकरण कीसित्ताद मंता. भूमि समतलीकरण संगेने, पूना एर्वु, डेबरी, कुट्टा तोस्तोर गोडकिन उण्डना एर सुविधा आल्केने एर्वु तिना कल्वा डेवी एर ओसी पंटा पण्डी कियना सौलत कित्तोर. पान्ता, (पुराना) एर्वु किन रिपेरिंग, गहरीकरण कित्तोर. गरीब परिवार किन लोक वेंडे बना कित्ताद मंता.

10 साल ता भूमि समतलीकरण समय ते-25,816 एकड़ भूमि किन समतलीकरण कित्तोर. पूना एर्वुक-1322, कुट्टा/डबरी-3,814, डोली-17,484, एर ओयना काल्वा-3,618, चुवा-551, गंडी तोसतादु-2,837, मोदी ना भाजपा सरकार अधिकार ते वत्ता पेरके अमल कित्ता नोटबंदी वेंडे क्रांतिकारी आंदोलन किन पैसा हिल्वा कियानोंक कित्ता कोशिश नडमाने क्रांतिकारी जनता, समीष्टि मेहनत कीसोरने, पंचायत जनताना सरकारकु जनताना विकास मैदे 2,92,45,855रु खर्च कित्ता. लूटी शासक वर्ग बोल्लना माटा किन सवाल कीसोरे, मेहनत कीसि जनताना सरकार पोरो विश्वास कीसि भूमि समतलीकरण तुन सफल कित्ता.

दक्षिण सबजोन ते 2019 ते गली रोड अभियान ताकि कित्तोर. पश्चिम बस्तर ते 247 नाहकिने, 213 किलो मीटर 838 मीटर, दरभा डिवीजन ते 297 किलो

मीटर, दक्षिण बस्तर ते 27 पंचायतकुना 214 नाहकुने 177 किलोमीटर, 364 मीटर रोड तोस्तोर. 84 परिवार किन लोको निर्माण कित्तोर. जनताना स्वास्थ्य मैदे साफ-सफाई ता अभियान चला कित्ताद मंता. दक्षिण बस्तर ते तीन साल गली रोड किने-तुमकू बने कित्तोर. जोनमेंड उंडलाइ नलुता एर मैदे बोरिंग, सीमेंट ता कुव्वा, डोल सुवा सैकडों संख्या ते निर्माण कित्तोर. लुटी सरकार जनताना विकास मैदे हजारों करोडों रुपया खर्च कीयमुंताम इंजी झूठा प्रचार कीयमुंता. मति मावा जनता वर्ग संघर्ष ते बेरस्ता राजनितिक चेतना संगे जनवादी महौल ते 10 साल बेनोरा लोता ओरे दोडा/गाटो तिंजी काम कित्तोर. ओण्ड पुटा डोडा/गाटो दोरकवा परिवार किन, नेंडु पोर्टा मेंड तिंदना मैदे दोरकमंता. क्रांतिकारी जनताना सरकारकु बुनियादी स्तर तिना जनताना वैकल्पिक आर्थिक, राजनीतिक, सांस्कृतिक व्यवस्था तुन दुश्मन ना पाशविक हमला, हिंदुत्व फासीवादीरा हमला किन मुकाबला कीसोरने निर्माण, विकास कीयमुंता.

2011 तिना 2020 एवना क्रांतिकारी जनताना सरकारकु ताकिकीत्ता भूमि समतलीकरण ता समीक्षा किन अलग ते मीयगा एक्वि कित्तोम. क्रांतिकारी स्फूर्ति संगे जनता हासिल कित्ता इद् अभियान ता सफलता किन जनताना नडमा व्यापक रूप ते प्रचार कीयना.

कॉमरेड्स,

मनवा देश ते जनयुद्ध संगे निर्माण आसि विकसित आसोरे मत्ता जनताना राज्यसत्ता इत्के जनताना सरकारकुन तमा लूटी सत्ता तुहक सवाल इंजि आल्सीसि तेनु मापनोंकि, आल्केने देश ते मंदना प्राकृतिक संपदा वेंडे संसाधनकुन लूटी कीसि ओयना मैदे इगटा क्रांतिकारी आंदोलन, दानकु नेतृत्व कीयना भारत ता काम्युनिस्ट पार्टी (माओवादी), तेना नेतृत्व ते लडेमायना पीएलजीए, जनताना सरकारकु अड्डाम मंता इंजी लूटेरी वर्ग साम्राज्यवादीर, दलाल नौकरशाही पूंजीपतीर, सामंतवादीर ओरा प्रतिनिधित्व कीयना केंद्र-राज्य सरकारकु इंजे 'समाधान' पेद्दीर ते प्रतिक्रांतिकारी रणनीतिक दमन योजना तुन पोयसी

'प्रहार' हमला किन तेज कित्ता. तेना अंतर्गत कॉरपेट सेक्युरिटी व्यवस्था तुन पेरसिकीसोरे पूना पुलिस कैंपकु वाटामंता. अत्याधुनिक हथियारकु, ड्रोनकु, युद्ध विमान किन, इलेक्ट्रानिक कम्युनिकेशन किन विस्तार कीयमुंता. 2022 ते क्रांतिकारी आंदोलन तुन पूरा मापितोम इंदमंता. इद् परिस्थिति ते नेण्ड वेंडे दुश्मन ना बेरसना दमन नडमाने मीरू संगठित मंजि जल-जंगल-जमीन-संसाधन,अस्तित्व-अस्मिता-इज्जत अधिकार किन नित्यी कीयना मैदे, वेंडे मनवा राज्य अधिकार - जनताना सरकारकुन बचाकीयानोंकि, मजबूत, कीयानोंकि जनयुद्ध/छापामार युद्ध ते वेंडे सक्रियता संगे शामिल आयना.

मावा देश ते नवजनवादी क्रांति तुन जीड़ना जोम लड़ाई तुन विडचवा लेवा क्रांतिकारी जिद्द संगे काम कीयना. असली स्वावलंबी आर्थिक, सांस्कृतिक व्यवस्था तुन विकसित, मजबूत, विस्तार कीयना मैदे सबे क्रांतिकारी जनता शामिल आयना. क्रांतिकारी जनता किन गोलबंद कीयना लोपा, ओरकिन हमेशा नेतृत्व हीयना लोपा, मनवा सत्ता तुन मुट्टि कीयनोंक दुश्मन कीयना सब्बे रकम ता साजिश - मुखबिर वेंडे कोवर्ट तंत्र किन विफल कीयना लोपा मुन्ने मंतिर इंजी विश्वास, आशा कीयमंता.

मनवा विकास, मना संगठित-समीष्टि मेहनत मावा कैदे ने मंता. कामरेड माओ वेहता लेक्का "जनताए इतिहास ता निर्मातालो". समाधान तुन, ताना अंतर्गत ताकना प्रहार हमलाउ किन हरा कीसोरे, दमन ते नुकसान अत्ता जनताना सरकारकुन पुननिर्माण कीसोरे, मनवा राज्यसत्ता तुन मजबूत, विस्तार कीसोरे मुन्ने दायना इंजी वेहसोरने इद मौका ते मीकिन जोन क्रांतिकारी जनताना सरकार समन्वय कमेटी भूमकाल ता लाल-लाल जोहार वेहतमुंता. ☺

**जोन क्रांतिकारी जनताना सरकार समन्वय कमेटी
दण्डकारण्य**

'समाधान-प्रहार' हमला किन सफलतापूर्वक सामना कियनोंक वेंडे हरा कीयना मैदे सब्बे पार्टी, पीएलजीए, संयुक्त मोर्चा किन पूरा तैयार कीयना. वराट, जनता पोर्से पूरा विश्वास कीसी इंजेटा देश, दुनिया ता अनुकूल परिस्थिति किन इस्तेमाल कीयना मैदे सृजनात्मकता, निपुणता किन पेरसी कियकाल. आधार इलाका बना कीयना लक्ष्य ते व्यापक जनता किन गोलबंद कीसि वर्ग संघर्ष, छापामार युद्ध किन तेज कीसोरे जनाधार, आत्मगत ताकत कुन पेरसी कीसेरे भारतीय क्रांति किन मुन्ने ओयना मैदे किरिया कियकाल. अमर शहीदीरा सपना किन सफल कियकाल.

दण्डकारण्य लोपा दस साल ता भूमि समतलीकरण अभियान सफल!

ग्रीनहण्ट, समाधान-प्रहार नडमा 'स्वावलम्बी आर्थिक विकास' ता कोशिश

मानेयना बत्काड ते विकास आयना इत्के कृषि नरगे महत्वतदु. कृषि विकास संगेने समाजिक, आर्थिक विकास किन कृषि विकास (बुनियादी) मुख्यतद, मति नेंडु भारत ता शासक वर्ग विकास पेदिदर ते कार्पोरेटीकरण किसी जनताना कृषि विकास, आर्थिक स्तर किन कम कीसि गुलाम लेक्के तैयार कीयमुंता.

मति दण्डकारण्य ता जनता माओवादी पार्टी नेतृत्व ते क्रांतिकारी जनताना सरकारकु पंचायत स्तर तिना डिविजन स्तर एवना निर्माण आसि, जोन क्रांतिकारी जनताना सरकार तैयारी/समन्वय कमेटी बने कित्ता. इद कमेटी जोन ते भूमि समतलीकरण अभियान इत्के 'स्वावलम्बन आर्थिक व्यवस्था निर्माण' कीयना मैदे 10 फरवरी 2011 ते जनताना राज्याधिकार स्थापना दिवस



पश्चिम बस्तर डिविजन-ते तालाब निर्माण

रूप ते भूमकाल तुन मानेमासोरे, भूमि समतलीकरण अभियान शुरु कियना इंजी आह्वान कित्ता. जनदिशा-वर्ग दिशा किन पोयसी नालू वर्गम ता जनताना सरकार जनताना राजनितिक, सामाजिक, आर्थिक विकास मैदे अभियान किन एत्ता. मुन्ने सुरवात लोपा गरीब परिवार किने भूमि समतलीकरण कीसिहियना इंजी एक दो साल कित्ता. परके कीत्ता काम किन, निर्दिष्ट समीक्षा कितस्के पोरो-पोरो काम ताकता, कीसित्ता काम उपयोग हिलवा लेक्का अत्ता इंजि समझेमत्ता. आल्केने नालू वर्गम ता जनताना सरकार लेक्के काम ताकताद इल्ले इंजी समीक्षा कीसि सुधार कित्ता मंता) इद अभियान मैदे जोन क्रांतिकारी जनताना सरकार तैयारी कमेटी बजट (पैसा) मंजूर कीसि, औजारकु तिंदना मैदे नूका-कुस्सीर किन तत्तावेहता. काम मारता पय्या आखरी दिया गुल्लैय जनता समीष्टि ते गोडकु, मेका तिंजी अपना परमपरा हिसाब ते डोल, गुजिरी, पाटा-डाका एन्दी वैय-वेडका मानेमाया मुंतोर. इद अभियान समय ते हजारों/लाखों जनता 250 पंचायतीकुना क्रांतिकारी जनताना

सरकारकु, 15 एआरपीसी, 2 एरिया सरकार समन्वय कमेटीगु, 3 डिविजन क्रांतिकारी जनताना सरकारकुना नेतृत्व ते भूमि समतलीकरण अभियान किन हर साल 20-25 दिना ताकी कीसि सफल कियमुंतोर.

इद अभियान समय ते डिविजन स्तर तिना पंचायत स्तर ता क्रांतिकारी जनताना सरकार एवना, सरकार कमेटी, कृषि शाखा ना वर्कशाप ताकी कीसि, अव वर्कशापने अपुना नार, पंचायत स्तर ते इद साल बेचोन परिवार किन, बेचोन एकड़ भूमि किन मरामत कीसियना, बेच्चोन पेट्टकु तोस्सना, एरवक तोस्सना, डोली बना कीयना, पांता पेट्टकिन मरामत/रिपेरिंग कीयना, नाटे, पंचायत स्तर ते समीष्टि (जनविरोधीलोरा जप्त कित्ता भूमि, एरुवकु) एरवकुना गहरीकीरण, निर्माण कीसि कीके विडसना, सिंचाई व्यवस्था, कमाई ते एर ओयना मैदे काल्वा बने कीयना इंजी वर्कशाप ते चर्चा कीसि वर्ग दिशा-जनदिशा अनुसार गरीब वर्ग परिवार, मध्यमवर्ग परिवार, धनी किसान, जनांदोलन ते शहीद अत्ता परिवार किन, जेल ते मंदना परिवार, पीएलजीए परिवार किन आल्केने राण्डी-सुण्डी (विधवा) परिवार किन क्र.ज.स अगा मंदना निर्दिष्ट परिस्थिति किन पोयसी भूमि समतलीकरण अभियान ताकि कीयना निर्णय एतीसी जनसंगठन, ग्रामसभा ते जनताना राय पोयसी फैसला कीता. फैसला कित्ता विषय किन तीन जनसंगठनकु पाटा, नाटक, माटा संगे विस्तृत रूप ते भूमि समतलीकरण महत्व बारे ते जनाता किन प्रोत्साहन कीसोरे प्रचार कीता.

भूमि समतलीकरण काम ताकनयो इंजी, दुश्मन काम कीयना जनता पोरो हमला कीसि वेरी पुट्टी कीयना मैदे फायरिंग कीसि झूठी मुठभेड ते दसियों संख्य ते जनता किन हत्या कियना, महिला किन



इंद्रावित कृषि विकास

हत्या-अत्याचार कियना, अरेस्ट कीसि झूठा केसकुने जेल ते वाटना कित्तोर. मति बेचोन दमन, हमला कित्तेकाई जनता परके गुच्चोर. इचुक इलाका ने पुलिस तोर लेवालिंग गाडी तच्ची मीकिन भूमिलेवालिंग

किसीयना मैदे सरकार इव गाडीकिन लोहता, ओयकिर वर्राटु इंजी गति कीसि उड़तोर. मति जनता विश्वास कीवोर. सही बाता इंजी पुत्तोर. इचुन साल/वर्षा कीवाद सरकार, इंजेकि बेले कीन्ता?.

जनता तम्म-तम्माये बचोनो नाहकिने एरु तिन्ना एर ओयना सिंचाई व्यवस्था मैदे दसियों संख्या ते कल्वा डेवता. कीके (मछली पालन) पोरपना मैदे डेबरी, कुटटकु, निर्माण कित्ता. भूमि समतलीकरण समय ते भूमि इल्वा गरीब परिवार किन जनताना सरकारकु भूमि ईसी समतलीकरण, सिंचाई मैदे एर सुविधा कीसित्तद मिंदे. समतलीकरण काम-काज ते बाता कमी मंता, लेस्कताद बाता इंजो पंचायत सरकार कमेटी (ग्रामसभा) ते समीक्षा कीसि जनताना राय एतिंता. पंचायत स्तर तिन्ना, डिविजन स्तर, जोन समन्वय कमेटी एवना समीक्षा कीसि, सबक एतीसि काम ते सुधार तत्ताद मंता..

भूमि समतलीकरण ताकना हर साल ते काम कीयना जनता किन दुश्मन हमला तिन्ना बचा कीयना मैदे मिलिशिया चारों तरफ संतरी, पेट्रोलिंग कीसोरे सुरक्षा जिम्मेदारी निभा कियमुंता. दुश्मन ता समाचार दोरकतस्के जनता किन अल्ट कीयना मैदे पटाखा पोक्की कीयमुंतोर. दुश्मन अचानक कल्यितस्के, हमला कितस्के, फायरिंग ते लडेमासोरे दस्सियों संख्या ते मावा जीवता मिलिशिया कमाण्डरकु, सदस्सीर, स्थानीय नेतृत्व कामरेड्स, दुश्मन ना प्रतिक्रांतिकारी क्रूर हमला ने झूठी मुठभेड ते तम्मा अनुमोल कुरबानी हीसि शहीद अत्तोर. ओर गुल्लैय तोर किन क्रांतिकारी लाल जोहर वेहकाल. घायल आयना, अरेस्ट आसी, झूठा केसकुने जेल ते तिप्पाल आया मुंतोर.

भूमि समतलीकरण ते पीएलजीए जनता संगे समीष्टि काम ते शामिल आयना, राका कीयना जिम्मेदारी तुन निभा कियमुंता. इद भूमि समतलीकरण इंदनादु ऑड सामूहिक जन आदोलन लेक्का ताकसोर वायमुंता.

इद अभियान ते पोलिस कैंप, थाना/शिविर ते मंदना जनता वेंडे प्रेरित आसी जनताना सरकार कमेटी तोर किन ताल्की समीष्टि ते भूमि समतलीकरण काम ताकिकीयना, अदिना रिपोर्ट, समीक्षा कीसि जनताना सरकार कमेटी किन लोहसियना, काम बारे ते सुजाव ताल्कना कियमुंतोर.

दक्षिण सब जोन ते 2019 तिना 2021 एवना गली रोड बना कीयना अभियान एतिसी, मूड डिवीजनकुना लोपा 461 नाहकु, 108 पंचायत, 2,950 किलो मीटर, 1,843 मीटर रोड जनता तोस्सतोर. रोड ते 60 सिमेंटु पुलिया, 66 मोटकिना पुलिया निर्माण कित्तोर. इद

अभियान ते लगभग ऑड दिया ते 10,276 संख्या ते जनता शामिल अत्तोर.

कोविड-19, बीमार किन मुन्नेने दण्डकारण्य ते गुल्लैय जनताना सरकारकु साफ-सफाई अभियान ताकी किता. भूमि मरामत समय ते जनताना सरकारकु जनता किन इलाज कीयना मैदे 1 लाख, 2 लाख रूपयाना दवाई अस्सी बीमार अत्ता जनता किन जनताना सरकार डॉक्टर लोर इलाज कियना, सेलैयन वटना, झडी-बुटी दवाई संगे वेंडे जनता तिप्पाल अइवा स्वस्थ्य मैदे जिम्मेदारी एता मुंता.

2011 तिन्ना 2021 एवना ताकी कित्ता काम लोपा 35,157 परिवार किन, 30,816 एकड जमीन किन समतलीकरण किताद मंता. उण्डना एर मैदे कुव्वा/सुव्वा, (डोल कुवा) रींगकुवा हजारों संख्या ते निर्माण कीसि जनताना उंडना एर ता समस्या तुन परिष्कार किता. कुएर ता पुल-पुलिया वेंडे निर्माण किताद मंता. इद भूमि समतलीकरण अभियान जनता

ना समीष्टि चेतना बेरसी/पेरसी किता. समीष्टि हिसाब ते 10-12 लोहकिना नागेलकु



कल्पी टीम/ब्याच बनेमासी उड़दना, कोयदना, विस्सना, लोहकु पंडना/मांडना, गरीब परिवार किन भूमि, विज्जा, नागली मदत दोरकमुंता. ईले नेण्डु दण्डकारण्य ते जनता करुविने डोल्वा लेवा साहकारी-समीष्टि मेहनत ते भूमि समतलीकरण संगे (जनताना सरकार मंदना इलाका ते) 'स्वालम्बन आर्थिक व्यवस्था विकास' किन बुनियादी वाटामुंतोर. समतलीकरण कीवा मुन्ने गरीब परिवार किन 7 (3 क्विंटल 1 कण्डी) कंडी वंजी पंडनाव, समतलीकरण कित्ता पेरिके इंजे 15-20 कंडी वंजी पंडा मुंता. इचुन परिवारकु रोपा (नार उरुस्तस्के) वाटी, 30 कंडी वंजी पंडी कियमुंतोर. तिंदना मैदे डोडा दोरकमुंता. गरीब किसान लागा-पागा (खर्जा) लेवा, आत्महत्या कीवा भूमि, जंगल पोरो आधार आसी आत्मसम्मान ते बत्कमुंतोर. इचुन गरीब परिवारकु, मध्यम स्तर ते; ज्यादा पंटा पंडी कीयना मध्यम परिवार धन्नीक परिवार बनेमतोर. मोटर साइकिल, ट्रक्टर, वंजी उस्सना मिल अस्सा मुंतोर. मति नार वाटि, एरुवता एर कल्वा ते ओसी पंटा पंडी कियनाद, कृषी पोरो केंद्रीकरण कियनाद कमि मंता. इदिन पेरसी कियना मंता.

2011 तिना 2017 एवनल जोन क्रांतिकारी जनताना सरकार तैयारी कमेटी भूमि समतलीकण काम मैदे बजट मंजूर कीसोरे वत्ता, मति 2017 ते मोदी भाजपा सरकार नोट बंदी तत्तोर, अगडल जनता अपना लोता डोडा/गटो तिन्जी, लोताव औजारकु

पोयसी प्रहार दमन नडमा 10-11 साल तिन्ना क्रांतिकारी जनताना काम तुन रोमि कीवा समीष्टि मेहनत ते समतलीकरण अभियान किन सफल कित्तोर. ◎

जंगल नाइकनादु रोमी कीयकाल, जंगल-पर्यावरण तुन बचा कीयकाल!

मना देश ता हिंदुत्व फासीवादी केंद्र सरकार, रज्य सरकार जनताना विकास पेदिदर ते 'मेक इन इंडिया' डोल पेसोरे देश, विदेशकुना कारपोरेट कम्पनीउ संगे "एमओयु" कीसि देश ता बहुमूल्य वन संपत्ति किन सौंपा कीयमुंतोर. हर दिना रोड, पुल-पुलिया, पर्याटक केंद्र, कारखाना, खदान-कम्पनी, बिडिया बांधकु बने कीयाना मैदे जंगल किन नाश कीयमुंतोर. रेल लाइन, हेलिपेड, रोड चौडीकरण कीयनास्के जेसीबी मशीनकुना संगे जंगल किन नाइकी रक रकमता प्लानटेशन वाटामुंतोर. तेना कारण ते जनता किन तमा भूमि वेंडे जंगल तल विस्थापित कीयामंतोर.

लूटी शासक वर्ग अमल कीयना कॉरपोरेट विकास मॉडल कारण ते पर्यावरण नुक्सान आयामुंता. खदान मंदना मेट्टा तुन डेवनाद, कुयेर पोर्रो बांध बना कीयनाद, चार लाइन हाईवे सडक, पुलिया निर्माण, शहरीकरण, भवन निर्माण मैदे मेट्टाकु डेवी मंजी गिट्टी, कच्च ओयनाद, पाईप लाईन वेंडे रेल लाइन निर्माण मैदे हजारों एकड़ जमीन कब्जा कीयनाद, लाखों मर्राक नडकानाद जरगामुंता. इवीना कारण ते जंगल, मेट्टा, तोंग, कुयेर, इल्का नुक्सान आयामुंता. लाखों मुलवासी विस्थापित आसी गुलाम लेक्का बत्कामुंतोर. कुयेर ता एरू प्रदूषण आयामुंता. वायू प्रदूषण वेंडे पेरसामुंता. बैलाडिला खदान तुन डेवना कारण ते मलिंगेर, तालपेर, डंकनी-शांकिनी कुयेर ता एर लाल आयमंता. लाल पानी कारण ते आस-पास मंदना 56 पंचायतकुना जनत किन उण्डना एर वेंडे दोरको आयमंता.

कॉरपोरेट कंपनीकुना कारण ते पर्यावरण नुक्सान आसी किडिनी बीमारी, 'कोरेना लेहकुता महमारी' फैला मासी जनत ना बत्काड बिरिया संकट ते अरता. तोंगु-इल्का ते मंदना एरू हिडकामुंता. जंगल, जल पोर्रो आधार अयाना आदीवासी जनता किन रक-रकाम ता बीमारी वाया मंता. मुसूर/पिरु ज्यादा वावंकु वीतता पण्टा वट्टेमायनाद, करवु/अकाल ते डोलनाद वेंडे जरगामुंता. मति लूटी सरकार जनताना विकास मैदे खेती-कमाई मैदे सिंचाई सुविधा कीयानोंकी आल्सो. कॉरपोरेट वर्ग ता विकास किन अमल कीयामुंता. देश ता जनता इव लूटी

सरकार ता कॉरपोरेट विकास योजना विरोध ते, पूना पुलिस कैंप, नरसंहार विरोध ते, विस्थापन विरोध ते जुझारू आंदोलन कीयमुंतोर.

जोन मेण्डु बार्डर इलाका ते जंगल तुन नडकी मंजी व्यापार कीयना लकडी माफिया, इसुका माफिया, फारेस्ट अधिकारीरा संगे सांठ-गांठ आसी जंगल ते बेस ता टेका, हरंगमारम, वेंगूरमारम, नंजूमर नडकी डोंगी/कल्ले किसी करोड़-करोड़ रूपए गडसा मंता. ईले जंगल तुन मापा मंतोर. इन्द्रावती, सबरी, गोदावरी कुयेर गरें इट्टा भट्टी चलाकीयाना, ठेकेदारीर, जंगल किन नडकना लकडी माफीया लोरकिन वेंडे ओरकिन मदद कीयनोर किन जनता नाटे नेंगवा लेवा पूंडाना.

दैनिक भस्कर से फाइल फोटो



रेल, जहाज, स्कूल, अस्पताल के बाद अब जंगलो का भी होगा निजीकरण!

कारपेट सेक्यूरिटी पेरसिकीसोरे सरकार मना एरिया ते पूना-पूना कैम्प, थाना निर्माण, कवरकु वेंडे बंकरकु मैदे, कैम्पनगा अट्टी पोडसनॉक पुलिसीर सैकडो मारम मर्रा नडकी ओयामुंतोर. इद आयवा फारेस्ट अधिकारीर संगे सांठ-गांठ आसी टेबल, कुरसी, पलंग (फर्नीचर) बना कीयना, बल्ला एककी मंजी अपना-अपना लोन ओसियना,

वम्माना दंदा कीसोरे पैसा गडसामुंतोर. जबरदस्ती जनताना भूमि ते बेगा-बेगा कोप वाटी रतनज्योत, नीलगिरी, टेका माडक पोर्पा मुंतोर.

अपना जनता वेडें भूमि आलो इंजो पोलम, एरका, दडडी/कचुल ते माडम किन किड्डी कीयना, काड़ा वाटना पेदिदर ते, कटाड़ अरतना पेद्विर ते जंगल तुन नडकामुंतोर. आकी वेरकी, उरवे, अलाईपेते मैदे वेंडे मर्रा किन मुट्टी कीयनाद मिंदे. वर्षतकु उच्चुन-उच्चुन नडकोरे तन्ना भूमि ता गरें मंदना गुबाल, इल्का पूरा नडकी पल कीयामुंतोर. आलकेने आरपीसी अनुमति लेवा धानी-मध्यम वर्ग किसान लोर ज्यादा जंगल तुन नडकानद ताका मंता. व्यक्तिस्वार्थ ते बेचोरे भूमि मत्के वेंडे आलो इंजी भूमि करवू (भुदाहम) लेक्का आल्सना रैतू जंगल तुन नडकी नुक्सान कीयामुंतोर.

जंगल लेवा नेल्लुता आक्सीजन /वाडिय दोरको, कुएरकु तोंगु, कुट्टा कुवा ना एर पूरा इडकीता. इद्रमासी एरू मैदे वेंडे साम्राज्यवादीरा, पूंजीपतिरा पोर्रो आधार आयना परिस्थिति वाया मंता.

अदिनके जंगल किन नाड़कानोर हर मानेय अलसना. नना ओंड माड़म नाड़कमुंतान इंजी अलसनायो. अद ओंड माड़म ता कीमत बाता इंजी समझेमायना. जंगल मता कारण ते आदिवासी जनता हजारों साल तिना जंगल पोरो आधार आसी बतकामंता. बीमार आत्केके दवाई मैदे वेंडे (आकी, मड्डा, तोल्का) जंगल पोरो आधारायमंतोर.

जल, जंगल, जमीन लेवा जनता बचेमाय परवोर. प्रकृति इत्के भूमि, पोड़दू लेंजू, एर, वाड़िय, मेट्टा, गुट्टा, जंगल, कुएर, जमीन लेहकातावु. बेदु ओंडु नुकसान अत्के पर्यावरण नुकसान आता, माने डोलितोर. निवा कम्पनी, कारखाना रूपया—माल मत्के वेंडे बाता कामतव अयो. जंगल तुन मापी

बाता कीयपरवाल अदिनके हर माने जंगल ता पोरो अलसना. मावा आदीवसी जनता इद जल, जंगल, जमीन, अस्मिता, अस्तित्व, अधिकार मैदे लडेमया मंतोर. अदीन मैदे जंगल किन पोरपाकल, बचेकियकाल.

लकडी माफिया, इसुका माफिया, वन विभागकुना खिलाफ ते लडेमायाना पोरो मनवा केंद्रीकरण मंदना. आल्केने मावा आदिवासी किसान जनता वेंडे विचार वात्तापु जंगल नडकनादय्यो. जनताना सरकार संगे तमा भूमि समस्या तुन हल कीयाना. जनताना सरकार भूमि लेवोरकिन जब भूमि तुन तूसालासि कोशिश कीता. आल्केने परतचोन पूना जंगल नडकावालेवा हूडाना. ©

दण्डकारण्य ते पूना पुलिस कैप, नरसंहार खिलाफ ते जुझारु जनप्रतिरोध

(अखबारकु, टीवी चैनलकु, इंटरनेट ते वात्ता सामग्री पोरो आधारसि दोड़ ता रिपोर्टकु रास्तोम—संपादक)

माड भूमि किन बचा कियाकल, गुण्डादुर हर्दे लडेमयाना आवाज गुरंजी किता गारपा जनसभा परालकोट परगना ते गारपा ग्रामसभा 2021



जनवरी महीना 22 तारीख तल 23 तारीख एवनल ताकता. 7000 मुल जनता शामिल आतोर. ताना लोप्पा 2500 महिलांग मंतांग. सबे जनता तमा पारंपरिक हथियार पोयसी, तमा रीति—रिवाज हिसाब ते पेन—हानल ता प्रतीक चिहना पोयसी पाटा—डाका संगे नारांग हीसोरे बैनर—पोस्टर संगे रैली पेसी कितोर. ताना पेरके पारंपरिक ग्रामसभा गठन ता प्रक्रिया शुरू आता. बंडा उर्सकी किरिया कित्तोर. इव सबे मारता पेरके सभा जागा ते वासी सभा तुन शुरू कित्तोर. तेना लोप्पो 11 मुल वक्तालोरु भाषण हित्तोर. ताना लोप्पा उंदी महिला मंता. नेंडू मंदाना अस्तित्व—आत्मसम्मान ता समस्या कुन हल कीयना ओसो माड़ भूमि तुन बचे कीयना मैदे भाषण लोप्पा मुख्य मुद्दांग पोरो सबे जनता चर्चा कित्तोर. पुलिस कैपकुन वापस ओयना ओसो प्रस्तावित पुलिस कैपकुन रद्द कीयना, माड़ पर्यावास कानून हालो स्वायत्तशासी विशाल बस्तर, स्वायत्तशासी माड़ पायजे इंजोर विवरण ते चर्चा कित्तोर. ताना संगे माड़िया समुदाय किन मापना साजिश किन पर्दाफास कीसोरे अपुना अस्तित्व, आत्म—सम्मान किन निल्पी कीयना इंजी, तमा

रीति—रिवाज किन राका कीयना इंजी वेने वक्तालोरु भाषण ते वेहतोर. अद्रमे इद सभा लोप्पा ओरा रीति—रिवाज कला—संस्कृति, पेन—हानल ता प्रतीक चिह्न पोयसी सांस्कृतिक प्रोग्राम वेने ताकी कित्तोर. तेना लोप्पा सैकडोंग कलाकारलोरु शामिल आत्तोर. इद प्रोग्राम लोप्पा कुतुल, नेलनार एरिया ता सबे जनता ओसो इंद्रावती एरिया ता उचुक नाहकुना लयास्कू—लयोर, सियान—सज्जन सबेतोरु जोश—गिरदा ता संगे शामिल आतोर. अद्रमे इद सभा किन सुरक्षा काजे वालन्टियर्स वेने तासतोर. जेक तल वात्ता जनता किन तिंदना—उंडना ता कमी आतेके तिंदना—उंडना ता व्यवस्था वेने कियले मत्ता. ओसो वात्ता जनता किन स्वास्थ्य सुविधा एवसी कीयना मैदे डॉक्टरलोरु व्यवस्था वेने कीसीमत्तोर. वालन्टियर्स ओसो डॉक्टरलोरु वेने तमा जिम्मेदारी तुन निभा कीयना कोशिश कित्तोर.

गलगम पूना सीआरपीएफ कैप विरोधी जनसंघर्ष.

कॉर्पेट—सेक्युरिटी किन विस्तार कीसि दुल्गाराज, चेद्देल मेट्टा नगा मंदना लोहा, सोना, चूना पत्थर, कोराण्डम निंडी मंदना बहुमूल्य खनिज संपदा, संसाधन किन डेवी ओयना, वेंडे नम्बीधारा ते पर्याटक केंद्र तुन शुरू कीसि मूलवासी जनता तुन अगातिना विस्थापन कीयना. आल्केने आवापल्ली तिंची तेलंगाना दायना रोड़ तुन पुनरनिर्माण कीसोरे पुल—पुलिया बना कीयना उद्देश्य ते इवेना सुरक्षा मैदे 26 फरवरी, 2021 ते गलगम नाटे पूना सीआरपीएफ कैप वाटतोर. गलगम आल्के आस—पास नाहकिना गुलय जनता आंध्र कूली अत्तस्के अदे मौका तुन ऊड़ी अयक्ने नडुम नरका वासि कैप वाटतोर इद कैप वाटता तुरंत ते आस—पास नाहकिन पोरो हमला कीसि कोरक, मेका, पद्धी लूटी

कीसि तिंदना, कल, लंदा मत्के उज दायनोर. आल्केने लोहकिना दरवाजा किन तोड़-फोड़ कीसि पैसा डोंगी ओयना कियनोर. गर्रे-गर्रे नाहकिना जनता किन मन वत्ता लेक्का गिरफ्तार कीसि जेल ओयना, रेहतना-कोटना कीसोरे महिला पोरो अत्याचार कीयना ऊड़ी मावा नाटेना मावा भूमि ते कैंप वाटना अयो, कैंप मत्के ईल्केने मावा पोरो दमन ताकी कीतीर इंजो इद अन्याय खिलाफ, पुलिस कैंप विरोध ते आस-पास नाहकिना जनता जम्मासि अंजी कैंप तुन घेराव कीसि नारा ईसोरे कैंप वापस ओयना, मावा जल-जंगल-जमीन पोरो माकिने अधिकार मंदना इंजी इंजी मांग पत्र इत्तोर। इद आंदोलन लोपा लगभग 300 मुल जनता शामिल अत्तोर.

इरकभट्टी ते स्वायत्तशासी अधिकार मैदे पथलगढ़ी

कोहकामेटा क्षेत्र ते इरकभट्टी नाटे जनता 5वीं-6वीं अनुसूची हिसाब ते स्वायत्तशासी माड़ ओसो 'मावा नाटे मावा राज' मंदना, मावा जल-जंगल-जमीन पोरो माकुन अधिकार मंदना इंजी 2021 मई ते ग्रामसभा आयोजन कितोर. ओसो पेसा कानून तहत 'मावा नाटे मावा राज' नारा पोयसी मावा 'जल-जंगल-जमीन' पोरो माकुन संपूर्ण अधिकार मंदना इंजी तमा परंपारिक हथियार पोयसी संघर्ष तुक प्रतीक लेहका बंडा उर्सकी ग्राम सभा गठन कितोर. मुख्य रूप ते कच्चापाल ते तत्तना पूना पुलिस कैंप किन विरोध कीसोरे ज्ञापन कोटिटीसी कलेक्टर किन लोहतोर. नवगठित ग्राम सभा माड़ पर्यावास पुनर्व्यवस्थापन कानून हालो, माकुन मावा जल-जंगल-जमीन ओसो पेसा कानून तहत मावा नाटे माकुन संपूर्ण अधिकार मंदना, सरकार सेना संगे कित्ता समझौता रद्द कीयना, ओसो ओरा अनुभव तल कोहकामेटा पुलिस कैंप वात्तागडल नाटेनोर पुलिस कैदे देब्बा तित्तादू मंता. नाटनोर कुन एद्दी ते उद्दी कीसी परेशान कित्तादू मंता, बच्चोरो मुल मारपीट, लूटपाट ता शिकार आत्तोर. महिलांग पोरो अत्याचार ता घटनांग केंजा मंतोम अदेन काजे मावा नाटे पुलिस कैंप तत्तना आयो. इंजे कोरोना संकट ता समय ते मावा नाटे कोरोना ता सही इलाज ता सुविधा, टेस्ट किट स्वास्थ्य केंद्र ते सबे मौसमी बीमारी ता इलाज ता सुविधा हीयना, इंजी फैसला एतित्तोर. इद पथरगढ़ी, ग्रामसभा तगा 1000 मुल जनता शामिल आतोर. ताना लोप्पा महिलांग वेने मंतांग.

एल्मागोंडा ते प्रस्तावित पुलिस कैंप विरोध ते जनसंघर्ष.

बस्तर संभाग ते मंदना बहुमूल्य खनिज सम्पत्ति संसाधन किन कारपोरेट घरानों तोरा फायदा मैदे मनमन्नी ते लूटी कीसि ओयनीक हरी बना कीयाना मैदे अर्ध-सैनिक बल ता पूना कैम्पकू/थाना वाटी पुलिया, रोडकू बना कियामुंतोर. पुलिस थाना, कैम्प विरोध ते जनता लगातार संघर्ष कियमुंतोर.

बस्तर संभाग ते कैम्प विरोधी ता संघर्ष कड़ियामेट्टा, पोटली, सिंगेरे, यमपूराम ता जन धूका चिंतागुफा थाना अंतर्गत एल्मागोंडा पंचायत ते एल्मागोंडा नाटे प्रस्तावित पुलिस कैम्प विरोध ते नाटे ना जनता ग्राम सभा कीसि राज्यपाल किन आवेदन पत्र सौम्पा कितोर. मति सरकार जनता ना मांग किन मानेमय्यो. सरकार मावा मांग बेस्के एवना मानेमय्यो अच्चोर जेल मावा विरोध प्रदर्शन तुन जारी के तासी तोम इंजो आस-पास ता जनता धरना मैदे तैयार अत्तोर.

एल्मागोंडा पंचायत मूलवासी बचाओ मंच नेतृत्व ते दिसंबर 14 तारिख 2021 ते एल्मागोंडा नाटे प्रस्तावित पुलिस कैम्प विरोध ते आनिश्चितकालीन धरना शुरू आत्ता. मति सरकार तिना बेदे आश्वासन इल्ला. इद धरना ते लग-भग 50-100 संख्या ते मंतोर.

एल्मागोंडा प्रस्तावित पूना पुलिस कैम्प विरोध ते जन आंदोलन ताकानस्केने फरवरी महीना ते आंदोलनरत जनता किन दबाकीसि पूना कैंप तुन वाटतोर. माकिन स्कूल, आस्पताल गावले, कैंप लागो इंजो मावा नाटे, मावा राज इंजो जनता वेंडे आंदोलन ता तैयारी ते मंता.

सिंगारम नरसंहार विरोध ते विशाल जनसभा

लूटी कीयाना शासक वर्ग तोर बस्तर लोपा निंडी मंदना प्राकृतिक सम्पदा किन कारपोरेट घरानों तोर किन सौंपा कीयाना मकसद संगे सल्वा जुडूम 2005 ते शुरू कितोर.

2008 जनवरी 8 तारिख ते भेज्जी तिंची सलवा जुडूम गुंडालोर पुलिसीर मैलासुर, चेंसाम, कोरोस, सिंगाराम, वेंजेलवाही नाटेना 18 मुल जनता किन लाईन निल्पी कीसि निर्मम हत्या कितोर. इद घटना किन ऑड साल मुन्ने 2007 ते सिंगाराम तगा 12 लोकिन पोड़सी जनता किन आंतकित कितोर. बस्तर संभाग लोपा अलग-अलग जागा ने कैम्प, फर्जी मुठभेड़, नरसंहार विरोध ते संघर्ष ना प्रभाव ते सिंगाराम नरसंहार विरोधी कमेटी 30 अक्टूबर ते गठन कीसि नवंबर 1 तारिख ते छत्तीसगढ़ राज्य स्थापना दिवस संदर्भ ते सिंगाराम दोषि पुलिस आधिकारी लोर किन सजा ईयाना, सिंगाराम नरसंहार ता न्यायिक जांच ता मांग पोयसी जनता रैली-जुलूस विरोध प्रदर्शन कितोर.

सिंगारम विशाल जन सभा



दिसंबर 5 तारिख तिना आनिश्चितकालीन रिले धरना ताकामुंता. सिंगाराम नरसंहार ता 14 वीं बरसी वेंडे मानेमात्तोर.

गोलापल्ली थाना ते 30-35 मुल अंजी मांग पत्र सौम्पा कीत्तोर. जनवरी 8 तारिख ते सिंगाराम जन शहिदीरा सभा किन अयोजन कितोर. शहिदीर किन दो मिनट मौनधारण कीसि 10.30 बजे तिना शुरू आसी 9 तारिख 9 बजे पूरा कार्यक्रम किन मारी कित्तोर. इद सभा ते सुकमा, बीजापुर जिला तिना लग-भग साढ़े 5000 किन पोर्सेये जनता शामिल अत्तोर.

मुख्या मांग सिंगाराम नरसंहार ता दोषी एपीओसी पुलिस किन सजा, मृतक परिवार किन एक-एक करोड, घायल परिवार किन 50-50 लाख रुपया मुआवजा ईयाना. बस्तर ते नरसंहार बंद कीयाना. बस्तर तिना गुलाय पुलिस कैम्प वापास ओयना, पेशा कानून, ग्राम सभा अधिकार किन लागू कीयना मांग पोयसी सभा तुन ताकी कितोर.

एमपुरम ते प्रस्तावित पुलिस कैम्प विरोधी जनसंघर्ष

पामेड़ एरिया एमपुरम नाटेना 17 जुलाई, 2021 ते बेनोर पुनवा पुलिसिरी वासी सुनम जोगा, करको शंकर,



एमपुरम में प्रस्तावित नये पुलिस कैम्प के खिलाफ 4 महीने से जारी धरना प्रदर्शन

करको सत्यम वेर मुक्विरा 30 एकड़ भूमि ते बेस कैम्प वाटना इंजी कोल्सतोर. ताना मैदे रोड शुरू कित्तोर. इदिन ऊड़ता ता आस-पास नाहकिना जनता मावा

जल-जंगल-जमीन, अस्तित्व, अस्मिता, आत्मसम्मान, इज्जत-अधिकार तुन बचा कियना मैदे प्रस्तावित पूना पुलिस कैम्प विरोध ते अदे भूमि ते धरना उद्धतोर. 19 जुलाई तिना शुरू अत्ता विरोध प्रदर्शन रोमवा लेवा नेण्ड एवना लगातार जारी मिदे. मूलवासी बचाओ मंच ता नेतृत्व ते जनता तमा न्यायिक मांग किन पोयसी जिला कलेक्टोरेट तगा अंजी ज्ञापन सौंपा कित्तोर. मति कलेक्टर जनताना मांग किन मानेमथोर. सरकार बेस्के एवना मावा मांग तुन मानेमथ्यो अचोन जोम मावा विरोध प्रदर्शन तुन जारी तासितोम इंजी सरकार संगे सवाल कीसोरे अपना-अपना लोता नूका, कुसीर पोयसी मावा 'नाटे मावा राज' इंजो 800 ता पोर्सेने जनता अनिश्चित कालीन धरना उद्धामुंतोर.

अत्ता 7 महीना जीड़ता दिल्ली ते ताकना किसान संघर्ष किन मदत ईसोरे एमपुरम प्रस्तावित पूना पुलिस कैम्प विरोधी संघर्षरत जनता 27 सितंबर, 2021 ते भाईचारा आंदोलन किन ताकि कित्तोर. संघर्ष संगे एमपुरम नाटेना जनता जल-जंगल-जमीन इवोम इज्जत-अधिकार मंदना इंजो दुसरी भूमकाल तेहतकाल इंजो नारा ईसोडे तेदमुंतोर.

एडसमेट्टा नरसंहार खिलाफ ते जन सभा

17 मई 2013 ते एडसमेट्टा नाटे ना जनता जमा आसी तमा विज्जा पाण्डूम कीसोर मतोर, लूटी सरकार



एडसमेट्टा नरसंहार के खिलाफ जन प्रतिरोध

9 अक्टोबर 2021



ता किराया अर्धसैनिक बलतोर अंधाधुंध फायरिंग कीसि 4 मुल सुडला पापालोर संगे, 8 मुल आम जनता किन औकतोर. इद घटना ते पांच मुल घायल अतोर, घटना

किन मीडिया, पेपर लोपा नक्सालवादीरा कैम्प पोरो हमला कितोम, 8 मुल माओवादीर डोलतोर इंजो झूठा प्रचार कितोर. मति जनता इद झूठ तुन भण्डाफोड कीयना मैदे कोर्ट ते अंजी केस दर्ज कितोर. इद घटना ता न्यायिक जांच कीयना इंजो मांग कित्तोर, जनताना मांग तुन सुप्रीम कोर्ट ता वीके अग्रावाल कमेटी न्यायिक जांच कीसि इद फर्जी केस इंजी फैसला कीसि सरकार किन रिपोर्ट सौम्पा कित्ता, मति सरकार इंजेके एवना जनता मुन्ने बेद जवाब हियापरवो, फर्जी केस दर्ज अत्ता पेरके वेण्डे सरकार नरसंहार ते शामिल अता दोषी पुलिस तोर किन सजा हियनोंकि पेरके मुने आसोरे केष तुन मिस्सना प्रयास कीयमुंता. मति एडसमेट्टा नरसंहार न्यायिक जांच कीयना रिपोर्ट किन पोयसी 9 अक्टोबर ते बुरगील नाटे आंदोलन ता धरना उद्धतोर. 9 अक्टोबर ते ज्ञापन सौंपा कीसि 17 अक्टोबर ते गंगालूर थाना ते अंजी भैरमगढ तहसीलदार, एसडीओपी किन तमवा मांग किन तासतोर. 7 अक्टूबर ते शहीदीर किन श्रद्धांजलि आर्पित कीसि सभा तुन शुरू कित्तोर. इद सभा ते महिला 2105, पुरुष 2311, पिल्ला 383, पेकोर 422, टोटल 5221 मुल शामिल अत्तोर.

एडसमेट्टा नरसंहार ते शामिल अत्ता दोषी पुलिस अधिकारीर, जवानलोर किन सजा हियना. पद तिना बर्खास्त कियना मांग पोयसि जनता लड़ेमायामंता.

आकाबेड़ा ते पुलिस कैप विरोधी रैली

2020 अक्टूबर 5 तारीख ते कुतुल, नेलनार एरिया तल 70-80 नाटेना जनता जमा आसी तमा मांग कुन जोरदार नारांग हीसोरे तोयामेट्टा तल आकाबेड़ा एवना रैली किसोर हत्तोर. ओसो आकाबेड़ा कैप मुन्ने पूरा भूमकाल जमा आसी धरना उददसी पत्रकारलोर कुन तमा मांग कुन वेहतोर. माड़ जनता जुझेमायना समस्या कुन ओरा मुन्ने तासतोर. इद रैली लोपा मुख्य मुद्दांग पुलिस कैप कुन वापस ओयाना. इंजेक मोहदी, कच्चापाल, गारपा ते तत्ताना पूना पुलिस कैप ता प्रस्ताव कुन तुरंत रद्द कीयाना. सरकार, माड़ ता एक-चौथाई भाग जमीन तुन भारत सेना ता प्रशिक्षण केंद्र पंडाना काजे कित्ता समझौता कुन रद्द कीयाना. माड़ पर्यावास पोरोय ते सीमित जमीन ते माड़ जनता कुन अधिकार हीसी पिस्ता पूरा जल-जंगल-जमीन, प्राकृतिक संसाधन कुन सरकार कब्जा कीयाना षडयंत्र तुन विरोध कीसोर ओसो रावघाट-चारगांव, आमदाई, तुलाडमेट्टा लोहा खदान कुन बचा कीयाना इंजी अद्रमे नेटा परिस्थिति ते कोरोना बीमारी मंता इंजी लूटी सरकार लॉकडाउन घोषित कित्तेके आई, पुलिस,

अर्ध सैनिक बलकुन खुला छूट हीसी लोपोटा नाहकुने गश्त अभियान ताकी कीसोर मंतोर.

अदेन काजे पुलिसतोरगडल, आदिवासी जनता कुन कोरोना टुण्डाना लेहका मंता इंजी पुलिस बल जंगल इलाका ते नेंगाना आयो इंजी मांग कीसोरे रैली कितोर. पुलिस कैप मुन्ने पुलिसतोर संगे सवाल ता सवाल पोल्लू मल्हसोरे तमा मांग पत्रकारलोरा संगे वेहची सरकार कुन केंजी कितोर. इद रैली ते 4000 तुक ज्यादाये महिला पुरुष शामिल आत्तोर. सबे पुलिस कैप कुन माड़ क्षेत्र तल तुरंत हटा कीयाना इंजी सबे भूमकाल उंदी एकता आसी वड़कतोर.

कोहकामेट्टा ते पुलिस कैप विरोधी रैली

24 अक्टूबर 2020 ते करीबन 48 नाहकुनोर जनता जमा आसी कोहकामेट्टा, डोंडरीपारा तल रैली कीसोरे पुलिस कैपकु वापस ओयाना. माड़ पर्यावास लागो, संपूर्ण माड़ भूमि पोरो माड़ जनता किन अधिकार



पुलिस अत्याचार के खिलाफ कोहकामेट्टा में रैली करते ग्रामीण-महिलाएं

हीयाना इंजी जोरदार नारांग हीसोरे कोहकामेट्टा कैप मुन्ने हजारों जनता रैली कीसोरे कैप ते दायनास्के कैप तल 200 गज जेक ते पुलिसतोर जनता कुन रोमी कितोर. अस्केने पत्रकारलोर ओसो तहसीलदार जनता ना मुन्ने वात्तोर. ओरा मुन्ने जनता जोरदार विरोध प्रदर्शन कीसोरे तमा मांग कुन तासतोर. तेना लोपो वेने आकाबेड़ा रैली ता अस्के तासता मुख्य मुद्दांग कुन इतेके पुलिस कैपकुन वापस ओयाना, ओसो इंजेक मोहदी, कच्चापाल, गारपा ते तत्ताना पूना पुलिस कैप ता प्रस्ताव कुन तुरंत रद्द कीयाना. सरकार, माड़ ता एक-चौथाई भाग जमीन तुन भारत सेना ता प्रशिक्षण केंद्र पंडाना काजे कित्ता समझौता कुन रद्द कीयाना. माड़ पर्यावास अधिकार पोरोय ते सीमित जमीन ते माड़ जनता कुन अधिकार हीसी पिस्ता पूरा जल-जंगल-जमीन, प्राकृतिक संसाधन कुन सरकार कब्जा कीयाना षडयंत्र तुन विरोध कीसोर ओसो रावघाट-चारगांव, आमदाई, तुलाडमेट्टा लोहा खदान कुन बचा कीयाना इंजी पत्रकारलोरा संगे वड़कतोर.

ओसो पुलिस-प्रशासन ता दमनकारी नीतिंग नगडल जनता कुन वायाना तिप्पल बारे ते वेहचोरे इवु कैपकु वात्तागडल गस्त ता पोरोय ते पुलिस बलकु लोपो नाहकु नगा नेंगसी जनता कुन मारपीट, लूटपाट कीयाना, पोयसी ओयाना, अत्याचार, गोलीबारी, हौकाना, झूठा केस तासी जेल तासना जनता तमा रोजे ता पिस्वल लोपो वायना समस्यांग कुन विस्तार ते वेहचोरे तमा मांग कुन पत्रकारलोरा संगे वेहतोर. तमा समस्या कुन चर्चा कितोर. कोहकामेटा रैली ते 2500 तुक ज्यादाये महिला, पुरुष शामिल आतोर.- मीटिंग शुरू आयाना मुन्ने 11 नवंबर ते मोंहदी नाटे ना पारंपरिक ग्राम सभा गठन कीसी, ग्राम सभा ते उचूक प्रस्तावकु कितोर. इदिना लोपो मुख्य रूप ते मोंहदी ते पुलिस कैप माकुन लागो, माड पर्यावास कानून लागो, संपूर्ण माड भूमि पोरो माकुन हक-अधिकार मंदाना, मावा जागा-जमीन ते सेना ता प्रशिक्षण शाला पंडाना आयो, ओसो मावा नाटे स्वास्थ्य सुविधा मंदाना, स्कूल मंता मति गुरुजीरा कमी मंता. गुरुजीर कुन निहाना, ओसो सिंचाई सुविधा ता वेने माकुन जरूरत मंता इंजी मांग कितोर. ओसो मावा ग्राम सभा ता अनुमति लेवा बदे वेने मावा नाटे कीयाना आयो इंजी वेने ग्राम सभा फैंसला कित्ता.

10 नवंबर तल 13 नवंबर एवना कुतुल वडदाल परगन ते 84 परगनतोर जनता जमा आसी तमा सामाजिक झंडा तेहची माड भूमि तुन बचा कीयाना काजे पूरा माड क्षेत्र ता भूमकाल उदिसी माड बचाओ सभा ताकी कितोर. इदिना लोपो 170 नाटे ना सियान-सज्जन, लयास्क-लयोर तमा परंपारिक हथियार विलकाडी, मर्स, कसेर, फरसी पोयसी तमा परंपारिक वेशभूषा ते शामिल आसी विस्तृत रूप ते चर्चा कितोर. इद सभा ते मुख्य मुद्दांग माड भूमि कुन बचा कीयाना, माड पर्यावास लागो, संपूर्ण माड भूमि पोरो इगडा जनता किन अधिकार मंदाना इंजी, रावघाट-चारगांव, आमदाई, तुलाडमेट्टा खदान कुन चालू कीसी जनता किन विस्थापन कीयाना कुन विरोध कीसोरे ओसो पुलिस कैपकुन वापस ओयाना अनि, कच्चापाल, मोंहदी, गारपा ते सरकार कित्ता पूना पुलिस कैप ता प्रस्ताव किन रद्द कीयाना, ग्रामसभा पेसा कानून मावा माड क्षेत्र ते लागू कीयाना, ओसो भारत सेना किन एक चौथाई भाग भूमि कुन सेना प्रशिक्षण शाला पंडाना काजे सरकार कित्ता समझौता किन रद्द कीयाना इंजी, इंद्रावती पुलिया निर्माण ता विरोध ते, माड विशाल इलाका तुन गोंदा-गोंदा कीसी, सीमित कीसी इगा मंदाना जनता पोरो दबाव तच्ची विस्थापन कीयाना लक्ष्य संगे ओरछा रोड ते इंडिया गेट तासी सीमित इलाका तुने माड इंदा मंतोर, इद्रम

माड क्षेत्र ता पहचान तुन, माडिया जनता ना पुटूल भूमि ता अस्तित्व तुने खत्म कीयाना, मापना साजिश कुन विरोध कितोर.

इद सभा 11 तारीख ते शुरू आता. रेला पाटा-डाका सांस्कृतिक प्रोग्राम संगे मीटिंग शुरू कितोर. वक्तालोरु पोरो रासता मुख्य मुद्दांग कुन पोयसी वर्रोर-वर्रोर मंच तगा वासी 40 मुल भाषण हित्तोर. ताना लोपो 12 महिलांग वेने मंतांग. सबे वक्तालोरु तमा भाषण ते माड भूमि तुन बचा कीयाना, ओसो पेसा कानून-5वीं, 6वीं अनुसूची अधिनियम बारे ते, माड ता रीति-रिवाज, कला-सांस्कृतिक कुन राका कीसोरे तेन विकास कीयाना बारे ते भाषण हितोर. ओसो भाषण नडमा-नडमा सांस्कृतिक प्रोग्राम वेने ताकी कितोर. दूसरा दिया 12 तारीख ते तमा पेन-हानल, मांदरी, कुडूडकु, परंपारिक वेशभूषा, परंपारिक हथियारकु-विलकाडी, मर्स-फरस, कसेर संगे तमा सामाजिक झंडा पोयसी रैली पेसी कितोर. नारांग हीसोरे बंडा उर्सी तमा नेल-भूम तुन, जल-जंगल-जमीन तुन पूरा माड भूमि कुने बचे कीयाना, राका कीयाना काजे दूसरी भूमकाल तेहताकाल इंजी किरिया कितोर. ओसो बीच-बीच ते पाटा-डाका एंदाना आजादी ता नारांग हीयाना, दूसरी भूमकाल तेहताकाल इंजी नारांग हीसोरे, ग्राम सभा पेसा कानून ता नारांग हीसोरे दूसरी दिया ता प्रोग्राम मारिह कितोर,

ओसो तीसरी दिया, 13 तारीख ते 190 जन महिला, पुरुष चार गाडींग ते हंजी आकाबेडा पुलिस कैप ते जोरदार विरोध प्रदर्शन कीसोरे इगडल तुरंते पुलिस कैप खाली कीयाना इंजी ज्ञापन सौंपे कितोर. इदे मौका ते 11 तारीख पुलिसतोर गस्ती पेसीसी बटवेडातोर इरवुर जन किन पिटाई कीसी मत्तोर. ओर इरवुर कुन वेने जनता पोयसी ओसी वेर बाता गलती कीसी मत्तोर मैदे, मीटू मावा नाटे वासी वेरकुन पिटाई कित्तीरु इंजी कैप ते जोरदार जनप्रदर्शन कीसोरे पुलिसतोर कुन कारण ताल्कतोर. अद जनप्रदर्शन बचोन शानदार मत्ता इतेके, आदिवासी जनता ना इद एकता तुन हूडसी आसपास तमा लोता काम ते वेडा ते वंजी कोयनोर, सुसायटी नूका तुक हनलेर महिला-पुरुष वेने तमा-तमा काम तुन विडची वितिशी हंजी जनप्रदर्शन ते शामिल आतोर. जनता ना इद विशाल एकता तुन हूडसी आकाबेडा पुलिसतोर उंदी वेने पोल्लू पेसी कीयोर. केमेकेने तमा कैप लोपो मत्तोर. बेके वेने पेसोर.

इद विशाल जन सभा ते 9500 पुरुष ओसो 5500 महिलांग पूरा 15000 जनता शामिल आतोर. सभा जागा ते 30 नग बैनरकु, 400 पोस्टरकु, 7 आदिवासी सामाजिक झंडांग ओसो माइक, साउण्ड बॉक्स आदि

ता व्यवस्था वेने कियले आत्ता. 600 पेज नारांग ओसो 100 मुल नारांग हीयनोर कुन तैयार कियलेर. सभा ता सुरक्षा आदि प्रबंध तुन हूडाला काजे करीबन 300 वालन्टियर्स तोर कुन अनि स्वास्थ्य सुविधा एवसि कीयाला 3 मुल स्वास्थ्यकर्मीलोर कुन व्यवस्था कियलेर. ओसो अद्रमे चार ट्रेक्टरकु वेने सभा ता जरूरत काजे प्रबंध कियलेर. सभा तुन ताकी कीयाला काजे लाईट व्यवस्था ओसो कीचन व्यवस्था नूका, दारी, सब्जी, नमक, हल्दी, मिर्च आदि ता अनि अटाना-बोडसना काजे वर्की व्यवस्था वेने बराबर कियलेर. इव सबे व्यवस्था कुन बराबर ताकी कीयाला काजे, संचालित कीयाला काजे अलग-अलग टीम कुन पंडलेर.

झारावाही ग्राम सभा ते जंगल हमार नारंग ना गुंझू

जनवरी महीना ते झारावाही ग्रामसभा ताकी कित्तोर. 18-20 नाटेनोर इद मीटिंग ते शामिल आतोर. 2500 जनता शामिल आतोर. तेना लोप्पो महिलांग 1000 मुल महिलांग मंतांग. इद सभा ते मुख्य रूप ते मोंहदी माड बचाओ सभा ते चर्चा कित्ता विषय कुन पोयसी 17 जन वक्तालोरु भाषण हित्तोर. अद्रमे सामाजिक झंडा तेहतोर. अद्रमे नारायणपुर आसपास तल वेने लयास्कु-लयोर, सियान-सज्जन वासी मत्तोर. रैली ते जल-जंगल-जमीन पोरो आदिवासीर कुन अधिकार मंदना. स्वायत्तशासी माड, स्वायत्तशासी विशाल बस्तर माकुन मंदना इंजी जोर-जोर ते जोश ता संगे नारांग हित्तोर.

‘जंगल पोरो सब्बे अधिकार आदीवासीरादे’

मोंहदी ग्राम सभा प्रस्तव

22 फरवरी, 2021 ते मोंहदी ते ग्रामसभा कित्तोर. इदिना लोप्पा कुतुल क्षुत्र ता 200 जनता शामिल आतोर. इगा 70 महिलांग मंतांग. इद ग्रामसभा ते पुलिस दमन, महिला ना पोरो अत्याचार कोहकामेटा कैप ता पुलिसतोर कित्ता महिला पोरो बलात्कार कीसी फांसी हित्ता घटना बारे ते ओसो जनता ना संपत्ति किन डरा-धमका कीसी तिंदना-उंडना, मारपीट, महिलांग संगे छेडछाड ओसो दायना-वायना जनता किन पहचान ताल्कना इव सबे तुन विरोध ते चर्चा कीसी कोहकामेटा नाटे ओसो आसपास नाटेना जनता संगे पूरा विवरण ते रिपोर्ट एतित्तोर. ओसो किसान समस्यांग बारे ते वेने चर्चा कित्तोर.

जनता ना जमीन कब्जा कीयना पटेल, पेड्डालोर

ओसो नाकेदार लोरा खिलाफ महिला संघर्ष

बेनूर थाना हेरे मंदाना पडंगाल नाटेना महिला, उचुन जन दादा लोर ग्राम सभा लोप्पा बहस कीतोर. सुप्रीम कोर्ट ता आदेश तुन मानेमासि मावा नार खाली कीवोम, मावा जल, जंगल, जमीन, मावा देवी-देवता

धरती-माता तुन विडचोम. नार विडचोम इंदना मावा राय मंता. नेण्ड मावा नाटेना पटेल, पटवाडी बनेमासी, गार्ड बनेमासी मावा नार, जंगल तुन कब्जा कीयना काजे नाकेदार लोर कुन तची मावा दायना वायना हरी तुन बाउण्ट्री फेंसिंग तासिसि पूरा बंद कीतोर.

वन सुरक्षा समिति ता अध्यक्ष बनेमासी पटेल कब्जा कीसि मतोर. दीदी लोर पटेल ना लोतगा अंजि मीवा पोरो जन अदालत तगा केस दर्ज कीयकोम अस्के निम्मा जेल दायलागार. जनताना संगे मंदना इतेके निम्मा तुरंत फेंसिंग तुन हटा कीयना, नहीं तो हूडा इतांग. जनविरोधी जमीनदार पटेल अद नाटेना पक्का घमडी तोर. पटेल कुन धमकी हीतांग दीदीस्कु अस्के पटेल तुरंते दीदीस्कुना मुन्ने गलती मानेमातोर. अद बाउण्ट्री तुन दीदीस्कु उंदि वडकालोहसितांग. अस्के डरेमासी तुरंत पटेल नाकेदार लोर पूरा तुन हटा कीतोर.

महिला ना पोरो बलात्कार कीत्ता कडेनार कैम्प ता पुलिस किन सजा हीयना!

23 सितंबर ते कडेनार कैम्प ता इरउर पुलिस तोर दाडंगो काजे वासी दाडंगो हिल्ले इतेके वेने केंजवालेवा उंदी लोते जबर्दस्ती होडितोर. लोते उंदी लेया मत्ता. बाकी परिवार तोर नेलीनिके अत्तोर. सरोजा साहू इंदना लेया किन पोयसि पक्काय धमकी हीसोरे दाडंगो उट्टोर. पक्काय होचिसिमंजि अद लेयातुन जबरन पोयसि बलात्कार कीतोर. अस्के अद पक्काय केयतास्के नाटेना जनता केंजिसी वासी बलात्कार कीयना पुलिस किन पोयसि जनता पक्काय पिटाई कीतोर. वेरोड पुलिस बुचकीसि वित्तितोर. चड्डीने मत्ता पुलिस किन पिटाई कीसोरे कडेनार थानेदार नगा ओसी निवा पुलिस तोर दाडंगो काजे वासी महिला ना पोरो बलात्कार कीतोर इंजि थानेदार किन जनता पक्काय झगडा कीतोर. पुलिस तोरकुन नौकरी तल टेंडिसि सजा हीयना मांग कीतोर.

कोहकामेटा महिलांग पोरो पुलिस अत्याचार विरोध रैली

20 मार्च, 2021 ते पुलिसतोर कोहकामेटा महिलांग पोरो कित्ता कुकृत्य किन विरोध कीसोरे, 3050 मुल जनता लोप्पा 1000 मुल महिलांग मंतांग सबेतोर जमाआसी बैनर-पोस्टर पोयसी घंटा जेक तल नारांग हीसोरे लंबी रैली पेसी कितोर.

कोहकामेटा पुलिस कैप वात्तागडल नाटेनोरा ओसो आसपास नाटेनोरा समस्यांग कई गुणा बेरसता. वाया-दाया कीयना नाटेनोर किन थाना मुन्ने एददी ते 8 घंटा उददी कीसी तासाना, मारपीट कीयना,

महिलांग कुन जूता अरके लात विहकना इद्रम कई बेरा आसपास ता नाटेनोर किन कियलेमंता.

ओसो पुलिसतोर बुक्के कोवाची पोरोय ता नाटे ना रांडी महिला किन बलात्कार कीसी फांसी वेडहसी हौकतोर. इदे आयो सावित्री नुरेटी, लक्ष्मी कोवाची ओसो मेस्सी कोवाची वेने बलात्कार ता शिकार आत्तांग.

जनता ना संपत्ति कुन लूटी कीसी ओयाना, साग-सब्जीतोर कुन डरा-धमका कीसी सब्जी ओयाना,

दण्डकारण्य लोपा खदानकुना खिलाफ ते जुझारु जनादोलन.

गडचिरोली ता 25 खदानकुना लीज रद्द कियना इंजी 25 तल 28 अक्टूबर एवना एटापल्ली ते जनता ना मोर्चा ओसो ठिया आंदोलन

गडचिरोली जिला ता पूरा 25 खदानकु मंतांग. सरकार इगडा आदिवासी जनता ना जल-जंगल-जमीन तुन खनीज संपत्ती तुन पूंजीपतिरकु लीज तूक हीतायो. अगडल जिला ता जनता ग्राम सभाना नेतृत्वते कई सालकुनल 25 खदान किन रद्द कियना मांग तुन पोयसी बार-बार ज्ञापन



हियना, मोर्चा, मीटिंग लोपा मांग पत्र हीताद मंता मति सरकार ओसो बेहरा कंपनिंग त्रिवेणी अर्थमूवर्स, लायडमेटाल लेक्काडोरक हीसी सुरक्षा साटी पूना पोलिस क्याम्प मंजूर कियना जबरदस्ती जनतानु विस्थापित कीसी खनीज संपदा तुन लूटी कियला 2021 ते ओसो जोर कितोर.

तेना खिलाफ ते जनता कुछ महिनानले जिला मेटोर उंद एकता आसी सुरजागढ, दमकोडी सहित जिला ता 25 खदान कुना खिलाफ ते 25 तल 28 अक्टोबर तक मोर्चा ओसो ठिया आंदोलन ताकिह तोर इद जनताना न्यायपूर्ण आंदोलन तुन फासीवादी सरकार दमन संगे दबे कियला कोशिश कीतोर. नेतृत्व कियना नेतालोरक सकारे पॉच बजे जबरदस्ती उंजतगडल पायसी ओतोर आणि बाकि जनतानु जबरदस्ती गाडीने उपीहची वापस कितोर. इदिन लोपा पोलिस राजनीतिक नेतालोर सबे कलिइसी कीता षडयंत्र मंता मति जनता ओसो वने तमा अधिकार तुन

पैसांग कल्लना, बातय चीजकु जनता हिवोन इतेके मारपीट कीयना, डरा-धमका कीयना, गोरगा रेह्ची उंडना इद्रम कई घटनांग सामने वात्तादू मंता. अदेन काजे जनता तमा समस्यांग किन पत्रकारलोरा मुन्ने तासी इद पुलिस कैप माकुन लागो. पुलिस कैप शासन-प्रशासन वापस ओयाना इंजी मांग कीसोरे इद रैली किन ताकी कित्तोर. ☉

पोयसी लडेमासोर मंतोर. जबतक खदान बंद आयो अचोन तक जनता पेरके गुचोर. जिला ता अपना जल-जंगल-जमीन तुन बचा कियला मुने वायना. जीवा हीकोम मति मेट्टा हीवोम इंदना नारा तुन पोयसी जन आंदोलन तुन और तेज कियना.

करकाघाट, तुमीरघाट कैप कुना खिलाफ चक्काजाम

बस्तर संभाग से खासकर उत्तर बस्तर कांकेर जिला, कोयलीबेड़ा ब्लॉक ते मत्ता प्राकृतिक खनिज संपत्ति कुन मनमर्जी ते कारसी ओयलासी ओसो पूंजीपतीलोर फायदा काजे शोषक-शासक वर्ग तोरा मुन्नेटले समझौता कीतोर. इव समझौताकुन तेज गति ते अमल कियना मकसद ते राज्य ता इंजेटा कांग्रेस (बघेल) सरकार 5 बटालियन अर्ध सैनिक बलकुन मांग कीता. केंद्र सरकार मानेमासी 5 बटालियन फोर्स तुन



मंजूर कीता. अदेनकाजे राज्य सरकार बस्तर संभाग ते बेगा इत्तेके अगा पूना-पूना कैपकुन उपी कीसोरे पुलिस छावनी ते तब्दील कीसोरे मंता.

छत्तीसगढ ता कांग्रेस सरकार 5वी अनुसूचि क्षेत्रेकुने ग्रामसभा ता अनुमति एतवा लेवा गैर संविधान रूप ते कोयलीबेड़ा ब्लॉक तेतुमीरघाट-करकाघाट कुने दसियों एकड़ ता हजारों मरांग कुन कदसी ओसो आदिवासी जनताना पेन-हानल कुना जगा तुन कब्जा कीसि 29 नवम्बर 2020 ते बीएसएफ कैपकु तास्तोर. जंगल कदिसी पर्यवारण तुन नुकसान कीसि, मुख्य रूप

ते जनता ना देवी-देवता तुन अपमान कियना, आदिवासी जनताना अस्मिता-अस्तित्व-आत्मसमान ओसो हक-अधिकारकुन हनन कितांकु आक्रोशित आता जनता इव कैपकुना खिलाफ ते कोयलीबेड़ा ब्लॉक ता सबे वर्ग ता जनता संगठित आसी कैप वायवा मुन्नटेले कैप लागो इंजी नवंबर 3 प्रतापुर, 14 नवंबर कटनार, करका-तुमीरघाट ते 3 दिवसिय, ओसो पंखाजुर एक सप्ताह हजारो जनता शामिल आसी विरोध कीतोर . अस्के वेने प्रशासन तगडल कैपकुन हटा कीवंकु मार्च 2021 ते इव कैपकुन तत्काल हटा कियना, पेसा कानून तुन शीर्घ रूप ते लागू कियाना, ओसो बस्तर संभाग तुक 6वीं अनुसूची दर्जा हियना मांगं पोयसी 3000 जनता पखांजूर ओसो दुर्गकोंदल ता राज्यमार्ग पोरो वासी बड़गांव पुलिया तगा उदी दिया चक्काजाम कीसि पूरा आवागमन कुन बंद कीतोर. इदु मौका ते जनता तमा मांग कुन तुरंत अमल किवेके उग्र आंदोलन कियकोम इंजी चेतवानी हिसोरे जनता तमा मांग पत्र कुन पखांजूर नायब तहसीलदार किन सौंपा कीतोर.

रावघाट-जगदलपुर रेल लाईन काजे विस्थापित आयोम.

देश विदेशी पूंजीपतीर रावघाट लोहा खदान तुन ओयना काजे रावघाट-जगदलपुर रेल लाईन पंडला केंद्र-राज्य सरकारकु विफल प्रयास कीयामंता. बस्तर ओसो कोण्डागांव बीच ते 92 कि.मी. ता रेल लाईन पंडाला काजे सरकार सर्वे काम चालू कीता. दीना काजे करीब 650 एकड़ जमीन तुन सरकार एतित्ता इंजि वेहिंता. मति सही बचोन एकड़ एतित्ता इंदनादि पुत्ता हिल्ले. इदु पूरा जमीन पूर्व बस्तर डिविजन ते वायार. बव बव नाहकु नगडल बचोन जमीन एतित्ता इंदनाद इंजेवनल सरकार खुलकर जनता किन वेहचोरे हिल्ले.

कोंडागांव जिला ता 120 एकड़ जनताना जमीन ओसो 355 एकड़ जंगल जमीन तुन सरकार कब्जा कीता. बस्तर जिला ता 85 एकड़ जंगल जमीन ओसो 90 एकड़ जनता ना जमीन तुन सरकार कब्जा कीता. अस्सल विषय बाता इतेके सरकार जंगल जमीन इंजि वेहता जमीन ते वेले साल तल खेती कीसोरे मंदना जनता मंतोर. जनता किन जमीन पट्टा हीवा लेवा, फसल टेंडना जमीन तुन अरक्षित जंगल इंजोरे भूपेश सरकार जनता तुन विस्थापित कीयला साजिश कीता. रावघाट-जगदलपुर रेल लाईन तुन खिलाफ कीसोरे, मावा जंगल, जमीन हीवोम इंजोरे विस्थापन खिलाफ जनांदोलन तुन तेज कीयना.

निको कंपनी ता दस्तावेजकुन संगे आमदाई खदान खोला कित्के बर्बाद आयना तुन विरोध कीसोरे जनताना जनसंघ

झठा ग्रमसभा -“मनाल गुलैय तोर पुत्तादे, नवंबर-दिसंबर, 2019 वेंडे जनवरी, 2020 ते डौला, आमदाईघाटी ते हजारों जनता आमदाई खदान बंद कीयना मांग कीसोरे आंदोलन कित्तोर. फर्जी ग्राम सभा किन विरोध कीसोरे दस्तावेज तोहतना इंजि मांग कित्तोर. पुलिसतोर वेंडे सरकारी अधिकारीर एक महीना ता समय ताळकतोर. मार्च 2020 ते निको कंपनी तोर उच्चुक कागज, दस्तावेज सर्व संघर्ष समिति किन हित्तोर. मति अवेना लोपा जनता ताळकता दस्तावेज हिल्ले’

छोटे डोंगर क्षेत्र ता 84 परगना ता जनताना पेन-आनल मंदना जीवता मेट्टा, पेटो-पेटो/किडडी-किडडी मंदना आमदाई मेट्टा ते



हजारों जनताना जिंदगी पीढि-पीढि तिंची जुड़ेमासी मंता. जाबुर-जाबुर मर्रा, पोदला, जडी बूटी दवाई इद मेट्टा निदता. इगता ओंड-ओंड कल ते नरगे मोला ता लौह अयस्क मिंदे. सैकड़ों रकम ता जडी-बूटी दवाई पीढि-पीढि तिंची इगता जनता किन बचा कियमुंता. दसियों रकाम ता वनोपज किन जम्मा कीसि, रक-रकाम ता माटी तिंजी बत्कना हजारों आदिवासी, गैर-आदिवासी जनताना जिंदगी इद मेट्टा संगे जुड़ेमासि मंता. 2 हजार हेक्टेयर लोपा फैलेमत्ता आमदाई मेट्टा तिंची उत्तमघाटी ते जलप्रपात पेसीता. इगाने आमदाई माता वेंडे मिंदे. इव मेट्टाने मंदना आदिवासी पेन-आनल (देवी-देवता) किन इगता जनता आस्था वेंडे अपुना संस्कृतिक धरोहर लेक्के मानेमांता. माड़ क्षेत्र ता मेट्टा निंची वायना माड़ कुएर आमदाई किन सरुंडोरे बोदली ताले सातधार गर्रें इंद्रावति किन कल्यीता. ओरछा तिंची वायना कदल कुएर वेड़मा ते माड़ कुएर ते कल्यीता. इव मेट्टाने बारह महीना पोंगना 20 किन ज्यादा हिल्का-कुएर/डोड्डा मंता.

लगभग एक सौ किन ज्यादा नाहकिना 60 हजार किन ज्यादा जनताना जिंदगी इव हिल्का-कुए ना पोरो आधारासि मंता. उंदना एर तिंची रेंड फसल डेंटना उपजाऊ जमीन किन वेंडे इदे एर आलिता. आल्केने इवेना संगे एक सौ नाहक पूरा प्रभावित आंता. नाहक पाड आंता, भूमि-नेली दांता, हजारों एकड़ जंगल नाश आंता. कच्च तुन साफ किल्के माड़ कुएर संगेने इगा तिंची पोंगना सुड़ला-सुड़ला 20 हिल्का-कुएकुना एर लाल आसि प्रदूषण आंता. पिट्टे-जानवर वेंडे मानेर इस्तेमाल कीयना लेक्के मन्नो आंता. उंडना एर मैदे जनता किन तिप्पाल आंता. 20 हजार हेक्टेयार ता जंगल, खेती जमीन पूरा नुकसान आंता. इद नुकसान तुन अंदाजा वाटना आसान अय्यो.

बैलाडिला खदान तुन कापरपोट घराना तोर किन इवोम इंजी, रेल लाइन किन तोड-फोड कीसि चक्काजाम कितोर.

27 सितम्बर 2021 बैलाडिला मेट्टा ने पण्डेवार कमलूर मेट्टा किन निजीकरण विरोध ते अव नाहकीनोर संगे आदिवासी संगठन तोर वेण्डे षामिल



अतोर। बैलाडिला ते दो ब्लाक किन जनता विरोध कितोर। एक ब्लाक ते 78 हेक्टेयर वेण्डे दुसरा ब्लाक ते 452 हेक्टेयर खदान मैदे टेंडर जारी कितोर। इद टेंडर किन विरोध कीसोरे निरास्त कीसोरे मांग कितोर। इव विषय किन पोयसी मीटिंग पण्डेवार बैठक ते पण्डेवार, मुण्डेर, झिरका, केषापूर, पुलगट्टा, कमलूर, कुपेर, गोंदपाल, मिडकुल नार वेण्डे कंवाल नार नाटे

ना सरपंच, उपसरपंच वेण्डे लग भग 4-5 सौ मुल जनता षामिल अतोर।

क्रांतिकारी दिवसकुना बारेते

10 फरवरी महान भूमकाल दिवस ब्रिटिश साम्राज्यवाद विरोध ते वीरयोद्धा गुण्डाधुर जल-जंगल-जमीन ता पोरो जनता ना अधिकार तुन बचे कीयला काजे महान भूमकाल लड़ाई तुन ताकी कीतोर. इद लड़ाई 10 फरवरी दिया जीड़ता. इदे दिया माड़िया राज ता स्थापना आता. इद महान भूमकाल लड़ाई ता सुरता ते हर साल 10 फरवरी तुन क्रांतिकारी जनता ना रकार स्थापना दिवस ता रूप ते नाटे-नाटे माने मासोरे मंतल. इद संद र्भ ते जोन मेण्डु तीन डिविजन सरकार, एरिया सरकार लोपा भूमकाल दिवस तुन जोन जनता ना समन्वय कमेटी ता आह्वान ता



मुताबीक इद साल ते माड़िया जनताना संपूर्ण स्वायत्तशासित काजे लडेमायकाल इंजी, भू-अर्जन पुनर्वास-पुनर व्यवस्थापन संशोधन कानून-2019 तुन रद्ध कीयना मांग पोयसी जल-जंगल-जमीन और अस्मिता-अस्तित्व ओसो मूल आदिवासी जनता ना अधिकार काजे दूसरा महान भूमकाल लड़ाई तुन तेज कीयाकल, मुन्ने ओ याकल इंदना जोश ता संगे नारा हीसोरे सैकड़ों ता संख्या ते महिला-पुरुष ओसो पिल्ला-पेकोर भूमकाल दिवस ते शामिल आतोर. हर जागा लोपा सीएनएम टीमकु अपना पाटा-डाका संगे कला प्रदर्शन कीत्तोर. 🌀

मनाल युद्ध किन खत्म कीयना पक्ष एतिताल, मनाल युद्ध कीयनोंक आल्सवाल, मति युद्ध किन मापना युद्ध संगेने आया परिंता, आल्केने बंदुक तुन सामना कीयना मैदे बंदुक पोयतना जरूरत मंता.

“जनता का जनवादी अधिनायकत्व” (30 जून, 1949)

एक साल ऐतिहासिक लड़ाई कीसि – मोदी सरकार किन विंगी कीसि तीन किसान कानून किन रद्ध कीयनोंक मजबूर कित्ता किसान आंदोलन कुन मावा क्रांतिकारी अभिनंदन!

साम्राज्यवाद किन निर्मूलन कीसि नव जनवादी क्रांति किन सफल कित्केने किसान लोरा समस्या किन परिष्कार ता हरी दोरकीता!

ब्राह्मणीय हिन्दुत्व फासीवादी मोदी सरकार साम्राज्यवादीर, दलाल पूंजीपतिरा फायदा मैदे, 2020, अगस्त महीना ते देशता किसान संबंधित बाजार किन पूरा कारपोरेट कम्पनिंग किन हियनोंकि तीन किसान

अर्थिक पॉलसिंग तच्ची अमल कीयमुंतोर. मनवा देश लोपा 1990 तिंची इव योजनांग किन अमल कीयमुंतोर. इव योजना अमल कित्ता कारण ते मनवा देश लोपा कृषि क्षेत्र संकट लोपा हरदीता. 1995 तिना 2020



किसान आंदोलन मदद ते जनांदोलन



विरोधी अध्यादेश तत्तोर. 2020 सितम्बर महीना ते संसद लोपा अदु अध्यादेश तुन कानून बना कित्तोर. ई लेक्का मोदी सरकार कारपोरेट कम्पनी किन नेक्का सेवा कीयना दलाल लेक्का साबित अत्ता. पूंजीपतिर-साम्राज्यवादी व्यवस्था वासी इंजेटक एवना 270 साल आयमुंता. दुनिया ता महान गुरुजीर मार्क्स, एंगेल्स मंदनास्केने –1850 लोपा पूंजीपति व्यवस्था किन आर्थिक संकट शुरु अत्ता. पेरके 1900 लोपा साम्राज्यवादी लेक्के बदली अत्ता. रेंडू विश्व युद्ध कित्तोर. 1970 तिंची साम्राज्यवादी आर्थिक व्यवस्था नेक्का गहरा संकट लोपा मंजी ताकामुंता. 2008 लोपा वत्ता महा संकट तिंची अदु बाहर पेसो. 2019-2020 लोपा पुटता कोविड बीमार संकट किन नेक्का पेरसी कित्ता. अदु बाहर वायनोंकि बाता हरी दोरको, बेले कोटो दानकिन उचुन समय बचा कीयनोंकि पूना

एवना 4 लाख किसानलोर उडिय वेली, दवाई उंडजी (आत्महत्या) डोलतोर. खासकर फासीवादी बीजेपी सरकार ता 7 साल लोपा 1 लाख मुल किसान लोर डोलतोर.

इदु कानून बेनोर फायदा मैदे बना कित्तोर इंदनादु पंजाब, हरियाणा, उत्तरप्रदेश, उत्तरखण्ड लोपा मंदना किसान संगठनतोर पूरा समझेमत्तोर. ताना कारण तेने अगस्त महीना ते अध्यादेश वतस्केने विरोध कित्तोर. कानून बना कित्ता पेरके आंदोलन शुरु कित्तोर. इद आंदोलन शुरुआत ते पंजाब, हरियाणा, उत्तरप्रदेश, उत्तराखण्ड सुडुन राजस्थान लोपा शुरु कित्तोर. पेरके इदु आंदोलन लम्बा समय ते ताकी कीयना इंजी समझेमत्तोर. अदे हिसाब ते जमने-जमने किसान संगठन किन एकता कीसि संयुक्त किसान मोर्चा इंदना संगठन बना कित्तोर. दीना लोपा 500 संगठन तोर

शामिल अत्तोर. सितम्बर, नवम्बर महीना ते रेंडु दम देशव्यापी बंद कित्तोर. 26 जनवरी 2021 ते गणतंत्र दिवस समय ते ट्रेक्टर रैली कित्तोर. आ पेरके दिल्ली शहर किन सरतिरीई मोर्चा बना कीसि अगाने लगातार आंदोलन ताकी कित्तोर. सिंधू बार्डर, टिकरी बार्डर, गजीयाबाद बार्डर ते अगाने टेंट वाटी लाखों संख्या ते आंदोलन

चला कित्तोर. सामूहिक किचन, सांस्कृतिक कार्यक्रम, महिला कार्यक्रम रक-रक मता कार्यक्रम किन चला कित्तोर. इद मोतम



उड़ता जनता किन किसान आंदोलन पोरो विश्वास पेरसता. पेरके मजदूर, छात्र, कर्मचारीर अल्केने अलग-अलग तबका ना जनता इदु आंदोलन किन मदद हित्तोर.

इद आंदोलन पोरो मोदी सरकार फासीवादी दमन ताकी कित्तोर. दुष्प्रचार कित्तोर. संयुक्त किसान मोर्चा लोपा मंदना नेतृत्वकारी पोरो, आंदोलन लोपा शामिल अत्ता जनता पोरो केस वाटतोर. किसानलोर पोरो राष्ट्रीय जांच एजेंसी किन इस्तेमाल कित्तोर. ऊपा कानून ते केस वाटतोर. पैसा संगे संगठन ते मंदनोर किन अस्सनोंक कोशिश कित्तोर. आंदोलन कीयना किसानलोर पोरो लाठीचार्ज, आंसू गैस, पाइप ते एर वाटना, बेस्के-बेस्के फायरिंग वेंडे कित्तोर. बीजेपी आरएसएस गुण्डालोर हमला कीयनोंकि कोशिश कित्तोर. दान तिंची बचा कीयनोंकि नौजवान लोरा संगे आत्मरक्षा दलम लेक्कटाव वालंटीर टीमस किन बना कीसि काउण्टर हमला कित्तोर. हमेशा संतरी मंदना व्यवस्था किन तासतोर. अचोन दमन ताकत्के वेंडे

किसान आंदोलन विंगवा लेवा, रोमवा लेवा 380 दिना ताकता. हिडगंम कारण ते ज्यादा मुल मुयतोर लेक्कटोर डोलतोर. दमन कारण ते उचुन मुल शहीद अत्तोर. कुल मिला कीसि 700 मुल शहीद अत्तोर.

इद आंदोलन लोपा विशेषता बाता इत्के किसान जनता हमेशा कुरबानी कीयनोंकि, आंदोलन कीयनोंकि

तैयार मत्तोर. देश लोपा मोदी सरकार वत्तास्के तिंची बेचोरो बुद्धिजीवि, सामाजिक कार्यकर्ता लोर किन, दलित, आदिवास

ी, मुसलमानलोर पोरो हमला कीयना, औकना, जेल ते तासनाद ताकामुंता. दीनकिन मुन्ने नागरिकता कानून विरोध ते ताकता आंदोलन लोपा देश ते मंदना विश्व विद्यालय छात्रलोर, महिला लम्बा आंदोलन चला कित्तोर. मोदी सरकार मजदूर लोरा अनुकूल मंदना कानून रद्ध कीसि मजदूर लोरा पोरो वेंडे हमला कीता. इद महौल लोपा किसान आंदोलन ई गुलैय तोरकिन प्रेरणा हीसि इसुंतोर इद आंदोलन लोपा शामिल अत्तोर. तना कारण ते देश लोपा इद किसान आंदोलन किन नेक्का मदद दोरकता. इद आंदोलन किन सोशल मीडिया लोपा बिरिया प्रचार दोरकता. विदेश लोपा वेंडे इद आंदोलन संबंधित प्रचार ताकता. विदेश ते वेंडे इदु आंदोलन किन मदद दोरकता. पंजाब ते सिक जनता, अमेरिका ते, केनडा देश ते मत्ता कारण ते अगातिना वेंडे बिड़िया समर्थन दोरकता. मोदी साम्राज्यवादीर किन नम्बर वन एंजेट इंजी पूरा दुनिया लोपा प्रचार अत्ता. इद आंदोलन ता कठिन परिस्थिति मत्के वेंडे, दमन पेरसत्के वेंडे नेतृत्वकारी गठिंग निच्ची मंजी

आखरी एवना आंदोलन किन नेतृत्व हियनादु ओंडु विशेषता मंता. इदु आंदोलन ताकता कारण ते किसान समस्या पोरो देश मेंडु चर्चा ताकता. दीना कारण ते किसान जनता ना चेतना पेरसता. इदु आंदोलन खासकर साम्राज्यवादी, दलाल पूंजीपतिलोर किन टारगेट कीसि ताकता. उडदोनकिन नेलि इंदाना नारा पोयसी कृषि क्रांति किन सफल कीसोरे नवजनवादी क्रांति किन सफल कीयाना संगेने इद् देश ता किसान वर्ग किन मुक्ति दोरकिंता. अद् हिसाब ते किसान आंदोलन नवजनवादी क्रांतिकारी आंदोलन ता हिस्सा आंदु.

संयुक्त किसान मोर्चा 11 दम सरकार संगे चर्चा कित्तोर. आंदोलन किन मापनीकि मोदी सरकार, सुप्रीम कोर्ट ओंडु कमेटी किन घोषणा कित्ता. इद कमेटी 2021 मार्च महीना ते रिपोर्ट बना कीसि हिता. किसान संयुक्त मोर्चा अदु कमेटी किन मान्यता हिवो. आंदोलन तुन कोर्ट ता दयरा लोपा पिंडगीसि मापनीकि इदु ओंटी योजना. दानकिन सही हिसाब तेने किसान कमेटी आंदोलन किन विडसवा लेवा ताकी कित्तोर. बुर्जुवा कोर्ट किन विश्वास कीयनाद अयो इंजी वेंड ओंडु दम समझेमात्ता. लड़ाई कीसि सफलता हासिल कीयनाद इंदनादे इद आंदोलन लोपा तोंदिता.

आखीर 2021 नवम्बर 26 ते कानून किन फासीवादी मोदी सरकार रद्ध कित्ता. पांच राज्य लोपा वायना चुनाव किन सामना कीयना मुश्किल लेक्के तोंदता इंदनादु ओंटी कारण मंता. मति साम्राज्यवादीर किन सेवा कीयना लोपा उचुन लेट आयमुंता इंजी मोदी कंद्रेमायमुंतोर. 2021 दिसम्बर महीना ते तत्कालिक रूप ते किसान आंदोलन रोमि कित्तोर. मति मोदी सरकार किन मांग हित्तोर. अदु मांग बिजली बिल किन रद्ध कीयना, 26 रकम पंटा किन समर्थन मोला हियना कानून बना कीयना, किसान लोर पोरो केस रद्ध कीयना, लेक्कटाव.

इंजे किसानलोर समस्याउ कानून किन रद्ध कित्तके वेंडे हमेशा मैदे परिष्कार आयो. देश लोपा भूमि सुधार किन अमल कीयना, जमींदारलोर कैदे मंदना जमीन, धार्मिक संस्था कैदे मंदना जमीन, सरकारी जमीन, कारपोरेट संस्था कैदे मंदना जमीन—इव गुलैय जमीन किन भूमि इल्वा वेंडे गरीब किसान किन हियना. कृषि विभाग किन विकास कीयनीकि एर ता सुविधा हियना. किसानलोरकिन पंटा ता जरूरत मैदे बैंक लागा सुविधा पेरसी कीयना. पंडी कित्ता हर पंटा किन

समर्थन मोला मंदनोंक बाजार पोरो कारपोरेट कम्पनी ना कंट्रोल तुन टेंडना. पर्यावरण अनुकूल पंटा वाटना लेक्के किसानलोर किन प्रोत्साहन हियना. किसानलोर किन गुलैय विषय लोपा आत्मनिर्भर मंदना लेक्का तैयार कीयना. कृषि विभाग किन बुनियादी लेक्के तासी औद्योगिक विभाग किन विकास कीयना. रेंडीन ओंडना पोरो आधारसि ओंड ताकना लेहका उडना. पोरो केता विषय इगा मंदना व्यवस्था लोपा अमल अयो. दाना मैदे इदु व्यवस्था किन पूरा बदली कीयना.

देश लोपा मंदना उत्पीडित जनता किन आजादी, समानता विकास तत्तानीक साम्राज्यवाद किन निर्मूलन कीयना. संकट ते मत्ता साम्राज्यवादी आर्थिक व्यवस्था नगा दुनिया किन मुन्ने ओयनोंक ताकत इल्ले, दीनकिन विकल्प समाजवादये. मना देश लोपा मजदूर, किसान, छात्र, दलित, आदिवासी, महिला, धार्मिक अल्पसंख्याक इंका अलग—अलग तबका ना जनता किन आजादी, समानता, सही विकास मंदना इत्के साम्राज्यवादी, दलाल पूंजीपति, सामंतवादी व्यवस्था किन निर्मूलन कीयना. ओरा कैदे मंदना सत्ता किन मजदूर, किसान वर्ग कैदे तच्ची हियना. व्यक्तिगत फायदा, स्वार्थ किन टेंडीसि समीष्टि फायदा मंदना, आत्मनिर्भर ते मंदना, पूना मूल्य संगे नवजनवादी व्यवस्था किन निर्माण कीयना. इदे लक्ष्य पोयसी भारत ता कम्युनिस्ट पार्टी (माओवादी) लड़ाई कीयमुंता. गेरिल्ला जोन लोपा पंचायती स्तर ते समष्टि फायदा, लूटी लेवा, आत्मनिर्भर लेक्कटाव बुनियादी नियम बना कीसि जनताना सरकार किन ताकी कीयमुंता. इवु पंचायत स्तर तिंची डिविजन स्तर लोपा ताकामुंता. इदु मजदूर, किसान, पेट्टीबुर्जुवा, राष्ट्रीय बुर्जुवा वर्ग ता समीष्टि सरकार इंजे मंदना लूटी सत्ता ता विकल्प लेक्का मंजि मुन्ने ताकामुंता. अदे हिसाब ते किसान समस्या इद व्यवस्था किन बदली कीसि पूना व्यवस्था किन निर्माण कीयना तानकिन संबंध मंता. अदिन मैदे नव जनवादी क्रांति किन सफल कीयना मैदे जनांदोलन, जनयुद्ध किन तेज कीसि विस्तार कीयना. नालू वर्ग ना एकता संगे दुश्मन किन निर्मूलन कीयना. अदिन मैदे दण्डकारण्य, झारखण्ड, ओडिसा, बिहार, मध्यप्रदेश राज्य लोपा परतचोन, मनवा ताकत अनुसार जनयुद्ध किन ताकि कीसोरे जनताना सरकार किन निर्माण कीसि, मजबूत कीसि, विस्तार कीयानोंकि कोशिश कीयना. इदे लक्ष्य संगे गुलैय तोर आंदोलन लोपा शामिल आयना इंजी आशा कीयमुंतोम. ☉

सफल अत्ता माड डिविजन क्रांतिकारी जनताना सरकार चौथी प्रतिनिधि सभा

माड डिविजन ते 3 साल ता क्रांतिकारी जनताना सरकार समीक्षा कीसि चौथी प्रतिनिधि सभा किन दुश्मन प्रहार हमला क्रांतिकारी जनता, पीएलजीए मदद ते सफल किताल. सभा शुरु आयना मुन्ने सभा तुन चला कीयना मैदे 3 जन संगे अध्यक्ष मंडल किन चुना किताना मंता.

शहीदीरा प्रस्ताव तुन मुन्ने पेश किताना मंता.



दीना लोपा सीसी कामरेड्स कॉ. लखमू दा. (हरिभूशण कोरोना) 2021 जून 21 ते शहीद अत्तोर. पूर्णेन्दू शंखर मुखजी (अंबर दा) 2021 अगस्तत ते, 14 अक्टोबर 2021 ते केंद्रीय कमेटी पोलित ब्यूरो सदस्य कॉ. साकेत दा. (अकिराजू हरगोपल) बीमार कारण ते, 13 नवम्बर 2021 ते मिलंद बाबूराव तेलतुंडे शहीद अत्तोर.

समाधान-प्रहार हमलाउना मुकाबला कीसोरे, झूठी मुठभेडकुने, बीमार कारण ते शहीद अत्ता कॉमरेडलोरा लोपा 2019 फरवरी 7 ते ताडिबला नरसंहार ते कॉ. शंकार, विज्जो, सुंदरी, शांति, रैयो, सुकला, पालो, सुंदरी शहीद अत्तोर. औरछा फायरिंग ते कामरेड संतु, गुममर्का ते कॉ. मासा, प्रभू, ओसो पल्ली ते 3 जन कामरेड्स शहीद अत्तोर. गुण्डाधूर स्कूल ते काम कीसोरे कॉ. दामा दादा (वरिष्ठ पार्टी सदस्य), कॉ. बुदरी दीदी (एसीएम), पीएलजीए कमाण्डरलोर, स्थानीय नेतृत्व कामरेड्स, मिलिशिया कामरेड्स शहीद अत्तोर. संगेने देश मेंटा माओवादी पार्टी नेतृत्व ते ताकना आंदोलन ते उच्चुर बुद्धिजीविलोर, क्रांतिकारी जनता शहीद अत्तोर. पेरु कम्युनिस्ट पार्टी ता संस्थापक अध्यक्ष कामरेड गोंजालो (सीसीएम) 21 सितंबर, 2021 ते जेल लोप्पा शोषक-शासक वर्ग ता अमानवीय अत्याचार ता कारण ते शहीद आतोर.

कुरबानी हित्ता सबे अमर शहीदीर किन पेदिदर-पेदिदर ते जोहार वेहसी शहीदीरा आशय किन पूरा कीयकाल इंजो किरिया कीसोरे डिविजन क्रांतिकारी जनताना सरकार प्रतिनिधि सभा शुरु कितोम.

तेना पेरके जेल ते मंदना सबे कामरेड्स किन चौथी प्रतिनिधि सभा संदेश प्रस्ताव किन अनुमोदन कित्ता. ओरा रिहाई मैदे आंदोलन ताकी कीयकाल इंजी, ओरकिन जेल तल पेसी कीयलासी कोशिश कीयकोम, जेल तिना पेसी वासी आंदोलन ते शामिल आंतोर इंजो आशा कीसोरे प्रस्ताव कित्ता.

माड भूमि ते सेना प्रशिक्षण केंद्र बना कीयना विरोध ते जनांदोलन तेहतना इंजी चौथी प्रतिनिधि सभा प्रस्ताव पारित कित्ता.

2021 नवम्बर महीना ते तीन दिया ताकता इद् चौथी प्रतिनिधि सभा ते तीन साल ता काम-काज तुन समीक्षा किताना मंता. समाधान-प्रहार दमन कारण ते उच्चुकर सरकारकु कमजोर, ध्वस्त अत्ता. अविन पूनरनिर्माण कीयना, मजबूत कीयना इंजी एतिता संगठितीकरण कर्तव्य तुन वेंडे समीक्षा कित्ता.

दुश्मन दमन बचोन वात्तेकाई क्रांतिकारी जनताना सरकार कामकाज किन ताकी कीयना लेहका दोड सरकार किन डिविजन सरकार मार्गदर्शन हीत्ताद् मंता. दीना लोपा उच्चुन मूल कामरेड्स अरेस्ट आयना, कमजोर आयना कारण ते अविना पूनरनिर्माण कीयना, मजबूत कीयना मैदे ओसो शाखा कमेटी फंक्शनिंग लोपा बदलाव तत्तना कोशिश ताकता. डिविजन जनताना सरकार शाखा कमेटी, पंचायती स्तर ते मंदना शाखा कमेटी किन सही मार्गदर्शन, समन्वय कीयाना जरूरत मंता. ई परिस्थिति लोपा निर्माणकुन गुप्त रूप ते ताकी कीसोरे जनसंघर्ष किन तेज कीयना आवश्यकता मंता. पीएलजीए ते हर पंचायत तिना भर्ती तुन बेरसी कीसि पीएलजीए किन मजबूत कीयना पोर्रो ध्यान हीयाना. जनताना सरकार किन बचा कीसोरे मनवा इलाका ते मंदना सुकली नेटवर्क किन ध्वस्त कीसोरे कंट्रोल कीयना. समाधान-प्रहार-3 हमला किन हरा कीयना मैदे जनताना सरकारकु जनांदोलन ताकी कीसोरे जनताना जल, जंगल, जमीन, इज्जत अधिकार किन बचा कीयना. जनताना सरकार किन रका कीसोरे, विकास कीसोरे विस्तार कीयना दिशा ते कोजी मुन्ने तासकाल. जनताना सरकार तुन निल्पी कीयना, मजबूत कीयाना, वेंडे बदलेमात्ता परिस्थिति अनुसार ते गुप्त रूप ते काम कीयाना इंजी माड डिविजन क्रांतिकारी जनताना सरकार चौथी प्रतिनिधि सभा निर्णय कित्ता. प्रतिनिधि सभा पूना डिविजन सरकार कमेटी किन चुनेकित्ता. ईले प्रतिनिधि सभा सफल अत्ता. ☉

पुलिस कैम्प, नरसंहार, सड़क विरोध ते साल मेंड तिना जारी सिलंगेर मूलवासी जनांदोलन

दण्डकारण्य ते हत्ता ढाई साल तिना जनांदोलनकु ताकामुंता. 26 अक्टूबर 2019 ते दरभा डिविजन पोटाली कैम्प विरोध जनता मिलटेंट आंदोलन कित्तोर. अगडल शुरु कीसि इंजेवनल बेचुको जागाने मूलवासीरा आंदोलन रोमवालेवा ताकमुंता. इविना लोपा 13 मई तिना शुरु अत्ता सिलंगेर मूलवासी जन आंदोलन महत्वपूर्णतदु. इंजे आदिवासी विरोध तुहक् ओंड बिडिया उदाहरण लेवोके ओंड चिहना लेहका बनेमात्ता.

बीजापुर, सुकमा जिला ता बिरिया संख्या तेने 13 तारीख तिना लगातार कैम्प विरोध ते आंदोलन शुरु कित्तोर. प्रत्रकारलोरकिन करंगी कैम्प विरोध ते तमा विचार तुन वेहतोर. मति मदद हियना मैदे वायना जनता किन डीआरजी गुंडालोर औकीतोम इंजी वेरहतना शुरु कित्तोर. मई 17 तारीख 10 हजार किन जीड़ि जनता जमा अत्तोर. फेंसिंग वायर वाटी जनता किन रेहता कोटा कित्तोर. जनता मिलटेंट हिसाब ते वेरियवा लेवा फेंसिंग वायर किन डिग-डग कीसोरे



24 नवम्बर पेसा दिवस



28 जून सारकेंनगुडा विशाल जनसभा



12 मई सिलंगेर प्रतिरोध



27 दिसम्बर किसान आंदोलन के समर्थन में



17 मई गोली काण्ड के खिलाफ जनक्रोश



आईजी बस्तर, आईजी सीआरपीएफ, बीजापुर एवं सुकमा जिले के कलेक्टर-एसपी ने सिलंगेर कैम्प का लिया जायजा

सुकमा-बीजापुर अंदि ता नार सिलंगेर ते वत्ता पूना पुलिस कैम्प विरोध ते जनता 2021 मई 13 तारीख तिना आंदोलन कीयमुंतोर.

पोटाली, चीकपाल, कडियामेट्टा कैम्प विरोधी आंदोलनकुना अनूभव तुन एती जनता सिलंगेर कैम्प ता विरोध ते अन्नी-मन्नी जीवा इंजी इद आंदोलन ते शामिल अत्तोर. मई 12 तारीख नरका-नरका 3 बजे जनता पूनवा कैम्प तुन उद्धी कित्तोर. इद खबर केंजता जनता सिलंगेर नाटेनोर, आसपास नाहकिनोर नाटे ना अनुमति इल्वा भूमि कमाई कीसि बत्काना मावा भूमि मीर बेले कैम्प वाटीतीर इंजी पुलिसीरा संगे नरगे चर्चा कित्तोर. मति जनताना माटा पुलिसतोर केंजोर. जनता किन देब्बा हिसोरे पूड़िउड़तोर. मति इद खबर केंजी

पुलिस कैम्प विरोध ते नारा हिसोरे लोपा नेंगतोर. जनता किन चर्चा कीयकाल रोमट इंजो वेहसोरे जनता पोर्रो फायरिंग कित्तोर, इद फायरिंग लोपा 14 साल ता उईका पाण्डू पहले शहीद अत्तोर. दाना पेरके गुण्डाम नाटेनोर - कोवासी वागाल 35 साल, 30 साल ता उरसम भीमा शहीद अत्तोर. इद घटना ते 30 मुल गंभीर ते घायल अत्तोर. 13 तिना 17 एवनल पुलिसीर कीत्ता लाठीचार्ज ते दसियों नाहकुना 296 मूल घायल अत्तोर. केंद्र ता भाजपा सरकार ता मार्गदर्शन ते मुख्यमंत्री भूपेश बघेल, बस्तर आईजी-पी.सुंदरराज आदेश तेने इद गोलीकाण्ड ताकता. जनता किन बयम पुट्टी कीसि आंदोलन किन रोमी कीयना लक्ष्य संगे जनता पोर्रो फायरिंग कित्तोर. मति वेरियवा लेवा इद

फायरिंग ता खबर केंजी बिरिया संख्या तेने जेक-जेक नाहकिनोर वेंडे सिलंगेर आंदोलन ते शामिल अत्तोर. प्रतिरोध वेंडे मजबूत ते पेरसी कित्तोर. इद गोली काण्ड ते गंभीर घायल अत्ता पुनेम सोमली गर्भावति महिला शहीद अत्ता. बिरिया संख्या ते जमा आयना जनता किन रोमी कीयना मैदे जगरगुण्डा पुलिस कैंप ता सीआरपीएफ तोर तोलोड़ नाटे मिडियाम मासा किन पोयस मंजी 21 मई दिया ते औकतोर. ईले 17 तिना 21 मई एवना 5 मुल जनताना जीवा अत्ता.

शहीद अत्ता मुवुरा लाश किन वेंडे जनता तमा कैंदे तासी प्रत्रकारलोर, बुद्धिजीलोर किन करंगी घायल अतोर किन मीडिया मुन्ने तोहसी पुलिसीरा नरसंहार

किन जनता, शहीदीरा परिवार काल्य बिरिया आम सभा आयोजन कित्तोर. जनता, परिवार तोर तमा मर्कू, मेयस्कु इद कैंप वापस दायना इंजी लडेमासी शहीद अत्ता कारण ते शहीदीरा आशय तुन पूरा कीयना मैदे सिलंगेर आंदोलन किन वेंडे मजबूत ते ताकी कीयकोम इंजी किरिया कित्तोर. इदे मौका ते आंदोलन ते शामिल अत्ता नौजवानलोर मूलवासी बचाओ मंच गठन कीसि तना पेदिदर तेने सिलंगेर आंदोलन किन नेतृत्व कीयना मैदे जिम्मेदारी एत्तोर. इद मीटिंग ते बेलाभटिया, नंदीनिसुंदर, सोनी सोड़ी, प्रत्रकारलोर वेंडे शामिल अत्तोर.

इद जनांदोलन किन मानवाधिकारलोर,



किन विरोध कीसोरे जनता नारा हीसि घायल अत्तोर किन इलाज कीयना इंजी, फायरिंग किया वेहता पुलिस अधिकारलोर किन, डीआरजी गुण्डालोर किन सजा हियना इंजी नारा हितोर. पोस्ट मार्टम किता लाश किन स्थानीय विधायक ना मुन्ने परिवार तोर सिलंगेर तत्तोर. सिलंगेर ते हजारों जनता सिलंगेर जन शहीदीरा श्रद्धाजलि सभा कीसि कैंप मुन्नेने अंतिम संस्कार कीयना इंजी जनता फैंसला कित्तोर, मति पुलिस तोर दबाव कीसि अपना-अपना नाटे ओयना इंजी वेहतोर. आले आसी तमा-तमा नाटे शहीदीर किन पोहतोर. वेंडे मई 28 ते हजारों जनता जमा आसी संस्मरण सभा

प्रत्रकारलोर, सामाजिक संगठनतोर नरगे मदद हितोर. इद नरसंहार विरोधी मीटिंग ते दोषी पुलिस अधिकारीर, पुलिस तोर किन सजा हियना इंजी, शहीद अत्तोर परवितोर किन एक-एक करोड, घायल अत्तोर किन 50-50 लाख मुअवाजा राशि हियना इंजी मांग कित्तोर. सिलंगेर कैंप विरोधी जनांदोलन किन मदद ते राज्य मेंडु सर्व आदिवासी समाज नेतृत्व ते जुलाई महीना ते 15 जिलाने आ पेरके अगस्त महीना ते 22 जिलाउने छत्तीसगढ़ ते धरना प्रदर्शन, जुलुस, चक्काजाम कीत्तोर. इद आंदोलन किन देश मेंड तल समर्थन दोरकता.

सिलंगेर आंदोलन दिल्ली ते ताकता एतिहासिक किसान आंदोलन ता नेतृत्वकारी संगठन संयुक्त किसान मोर्चा संगे जुडेमात्ता. संयुक्त किसान मोर्चा तीन कृषि कानून विरोध ते 27 सितम्बर 2021 ते हित्ता भारत बंद ता आह्वान किन समर्थन हिसोरे मूलवासी बचाओ मंच नेतृत्व ते सिलंगेर लोपा मूलवासी किसान एकता सभा किन आयोजन कित्तोर. इद सभा रेंड दिना ताकता. सभा ते 35 हजार जनता शामिल आसी मूलवासी, किसान एकता किन पोर्रो तेहसी पोयतोर.

दिनाल-दिनाल पेरसना संघर्ष किन देश-दुनिया तिंची दोरकना समर्थन, मदत तुन उडसी वेरियता भूपेश बघेल 9 मुल संगे ऑड प्रतिनिधि मंडल किन सिलंगेर लोहतोर. इद प्रतिनिधि मंडल ता अध्यक्ष बस्तर सासंद दीपक बैज मत्तोर वेंडे कोवासी लखमा किन विडसी बस्तर ता 8 विधायक लोर सदस्य लेक्का मत्तोर. इद प्रतिनिधि मंडल ता संगे जरगता चर्चा लोपा मंच ता नेतालोर स्पष्ट रूप ते सिलंगेर संगेने बर्रेगुडेम, दर्भा नाटे वाटना पूना पुलिस कॅंप किन तत्काल वापस ओयना. नरसंहार ता जिम्मेदार पुलिस अधिकारीर बस्तर आईजी सुंदरराज.पी, बीजापुर एसपी कमलोचन कश्यप, सुकमा एसपी जीतेंद्र शुक्ला किन नौकरी तिंची टेंडना, वेंडे भारतीय दंड संहिता ता धारा 302, 307 हिसाब ते मुकदमा ताकी कीसि कडी सजा हियना, गोलीकांड पोर्रो उच्च न्यायालय ता न्यायाधीश संगे जांच कियना इंजि मांग वाटतोर. मूलवसी बचाओ मंच 8 जून ते बिडिया सभा किन आयोजन कित्ता. इद सभा ते लगभग 60 हजार जनताना भागीदारी अत्तोर. इद सभा ते वायना सामाजिक संगठन तोर आदिवासी, सामाजिक संगठन तोर किन शासन-प्रशासन रोमि कित्ता. तेलंगाना तिना वायना जनवादीलोर किन वेंडे बंद कित्तोर. इद बंद तुन विरोध कीसोरे बेला भाटिया, किसान आंदोलन प्रतिनिधिलोर, मानवाधिकार संगठन ता कार्यकर्ता श्रेया, दिल्ली तिना नंदीनिसुंदर (प्रोफेसर), समाजिक कार्यकर्ता बेला भाटिया, पत्रकार कमल शुक्ला वेंडे देश मेंड आदिवासी संगठनकुना नेतालोर इद सिलंगेर आंदोलन ता मीटिंग ते शामिल आसी नरसंहार खिलाफ भाषण हितोर. इदे दिना कलेक्टर वेंडे चर्चा कीयना मैदे वत्तोर. मति जनता किन उडी ओरु तर्रेम थाना ते अंजी मूलवासी बचाओ मंच तोरकिन थाना ते चर्चा कीयकाल इंजी खबर कित्तोर. कलेक्टर बार-बार संघर्ष किन रोमी कीयना इंजी वेहतोर. मति मूलवासी जनता मानेमायोर, अखर ते मुख्यमंत्री ना संगे चर्चा कीयना कार्यक्रम तय कित्तोर.

9 जून ते मंच ता नेतालोर, जमीन मालिक कोरसा भीमा, गोलीबारी ते शहीद अत्ता परिवार तोर मुख्य मंत्री संगे चर्चा कियना मैद बीजापुर अत्तोर. 12 जून ते भूपेश बघेल संगे वर्चुवल मीटिंग जरगता. कोवासी लखमाल वेंडे इद बैठक लोपा शामिल मत्तोर. मति अद वार्ता विफल अत्ता. अदेनके आंदोलन जारी मंता. नडमा अगस्त महीना ते वेंडोंड दम मुख्य मंत्री संगे मूलवासी बचाओ मंच तोरा रायपुर ते सीधी बातचीत ताकतस्के वेंडे विफल अत्ता. आंदोलन ता हर मौका ते मूलवासी संस्कृतिक कला मंच डाका-पाटा संगे कला प्रदर्शन कित्ता. 28 जून ते सारकेनगुडा नरसंहार ता 9वीं वर्षगांठ मौका ते मूलवासी बचाओ मंच सारगेनगुडा संस्मरण सभा किन आयोजन कित्ता. सारकेनगुडा शहीद परिवार तोर तमा मर्क-मयस्क किन एजा कीसोरे केंद्र-राज्य सरकार तत्तना दमन तुन विरोध कीसोरे शहीदीर हरदे लडेमायकाल इंजी अदे शहीदीर किन मनल कीयना सही श्रद्धाजलि इंजी वेहतोर. इद मीटिंग ते बीजापुर, सुकमा, दंतेवाडा ता 65 हजार मुल जनता शामिल अत्तोर. इद सभा किन अनुमति हिल्ले इंजी पुलिस रोमी कीयनोंक कोशिश कित्तोर. मति हजारों जनता मुन्ने ओरा कोशिश विफल अत्ता. जनता सिलंगेर तिना सारकेनगुडा, सारकेनगुडा तिना राज्य-देश मेंड ता जनवादीलोर, पत्रकारलोर, बुद्धिजीविलोरा, आदिवासी नेतालोरा मदद एतीसि सिलंगेर आंदोलन ताकामुंता.

24 दिसंबर 2021 ते पेसा दिवस किन मानेमातद मंता. इद मौका ते मूलवासी/आदिवासी जनताना बतकड मैदे, मनवा जल, जंगल, जमीन किन राका कीयाना मैदे, तिंदाना-उंडना, केरदना, मंदाना तरीका किन, मनवा नेलुटा रीति-रिवाज किन बचाकीयानोंकि आंदोलन किन जारी तासाना इंजी निर्णय कित्तोर. विस्थापन ता विरोध ते, पूना पुलिस कॅंपकुना विरोध ते, आदिवासी पिल्ला-पेकोर किन पढेमायना मैदे जाति वेंडे निवास प्रमाण पत्र मंजूर कीयाना, मनवा आदिवासी जनता किन झूठी मुठभेडकुने औकना विरोध ते, जनसंहारकुना खिलाफ ते, गश्ती पेद्दीर ते मनवा नाहकुन पोडसना खिलाफ ते, जनता किन रेहतना, जेल ओयाना तुन बंद कीयना अधिकार, ईले ग्रामसभा किन मंदाना अधिकारकुन अमल कीयाना इंजि जनता मांग कियामुंता.

आ पेरके 10 फरवरी मौका ते सिलंगेर ते मूलवासी बचाओ मंच महान बस्तर भूमकाल दिवस तुन मानेमात्ता. खेल-कूद प्रतियोगिता ताकता. सांस्कृतिक आयोजन वेंडे ताकता.

8 मार्च मौका ते वेंडे सिलंगेर ते अंतर्राष्ट्रीय महिला दिवस तुन महिलाना पोरो पुलिस कैंपकुना पुलीसीर कीयाना अत्याचारकुना खिलाफ ते मानेमात्तोर.

23 मार्च दिया ते भारत ता आजादी ता योद्धालोर शहीद भगत सिंह, राजगुरु, सुकदेव लोरा बलिदान किन एजा कीसोरे मानेमात्तोर. इद् सभा लोपा यूक्रेन पोरो रूस कित्ता सैनिक हमला तुन विरोध कीसोरे तुरंत युद्ध तुन रोमिकीयाना मांग कीत्ता. आल्केने नाटो किन रद्द कीयाना मांग वेंडे पोयतोर.

बस्तर संभाग ते ताकना गुल्लय जन आंदोलनकुन ताकिकीयाना संगठनकुनोर कल्यि मंजि 24 मार्च ते चलो रायपुर आंदोलन किन सफलतापूर्वक

ताकिकीत्तोर. अद् आंदोलन तुन हूडि मंजि मुख्यमंत्री 25 मार्च ते आंदोलनकारी नेतालोरा संगे रायपुर मुख्यमंत्री कार्यालय ते सीधी बातचीत कीत्तोर. अगा ओंड महीना लोपा सब्बे मांगकिन पूरा कीयाकान इंजो हामी हित्तोर. आंदोलनकारीर आंदोलन तुन बंद कीवोम इंजो, मुख्यमंत्री आश्वासन ता समय आयाना जोम आंदोलन तुन जारी तासोरे इंतजार कीयाकोम इंजी पत्रकारलोरा संगे वेहतोर. मांग मानेमायवेके आंदोलन किन उग्र बनाकीयाकोम इंजि वेंडे वेहतोर. अद् स्फूर्ति संगेने सिलंगेर आंदोलन ताकमुंता. ☉

10 फरवरी – महान भूमकाल ता 112वीं वर्षगांठ मौका ते

जनताना सरकार स्थापना दिवस तुन वैय-वेडका संगे नाटे-नाटे मानेमायमुट्टु!

जन आंदोलन, जन प्रतिरोध, जनयुद्ध लोपा जनताकिन गोलबंद कीसोरे

दुश्मन ना समाधान-प्रहार हमलाउ किन हरा कीयकाल!

जनताना सरकारकुन बचा कीयकाल, मजबूत कीयकाल, विस्तार कीयकाल!

(जोन जनताना सरकार समन्वय कमेटी संदेश ता मुख्य अंश)

महान भूमकाल लड़ाई ता 112वीं वर्षगांठ ता मौका ते दंडकारण्य जोन क्रांतिकारी जनताना सरकार समन्वय कमेटी गुल्लय क्रांतिकारी जनताना सरकारकुना, जन संगठनकुना नेतालोरकिन, कार्यकर्तालोरकिन, जनता किन क्रांतिकारी अभिनंदन संगे लाल सलाम् केत्तता. वायना 10 फरवरी ते जनताना सरकार स्थापना दिवस तुन क्रांतिकारी जोश, वैय-वेडका संगे नाटे-नाटे मानेमायना इंजो आह्वान कीत्ता.

वीर गुंडाधुर, डेबरी धुर, आयतु महारा संगेने महान भूमकाल लड़ाई ता गुल्लय शहीद वीर योद्धालोरकिन इद् मौका ते समन्वय कमेटी आदर-सम्मान संगे एजा कीसोरे, भूमकाल जोहार-लाल सलाम् वेहत्ता.

लुटेरी केंद्र, राज्य सरकारकु इंजे ताकिकीयाना प्रतिक्रांतिकारी रणनीतिक समाधान दमन योजना ता प्रहार हमलाउ किन हिम्मत, साहस संगे मुकाबला कीसोरे वेंडे दुर्घटना, बीमारी संगे शहीद अत्ता पार्टी, पीएलजीए ता 135 तुहक ज्यादाए नेतालोर, कार्यकर्तालोर, कमांडरलोर, योद्धालोर – भारत की कम्युनिस्ट पार्टी (माओवादी) ता केंद्रीय कमेटी सदस्यलोर कॉमरेड्स साकेत/अक्किराजु हरगोपाल (पोलित ब्यूरो सदस्य), अंबर दा/पूर्णदु शेकर मुखर्जी, हरिभूषण/यापा नारायण, दीपक/मिलिंद तेलतुंबडे, दंडकारण्य स्पेशल जोनल कमेटी सदस्य कॉमरेड पवन/रुषि हिच्चामी संगेने गुल्लय तोरकिन वेंडे

समाधान-प्रहार हमलाउ ना नडमाने जोन जनताना सरकार समन्वय कमेटी हत्ता भूमकाल संदेश ते हित्ता कार्यभारकुन सफल कीयनोंकि कोशिश कीसोरे, जन आंदोलनकुने शामिल आसोरे, पुलीसीर कीत्ता जनसंहार, झूठी मुठभेडकु, मुठभेडकु लोपा, दुर्घटनाने, बीमारी कारण ते शहीद अत्ता जन संगठनकुना, जनताना सरकारकुना नेतालोर, कार्यकर्तालोर, जन मिलिशियातोर वेंडे क्रांतिकारी जनता गुल्लैय कल्पी 31 मुल किन जोन जनताना सरकार समन्वय कमेटी तला वरिसि क्रांतिकारी जोहार-लाल सलाम् वेहत्ता. ओरा अधूरा आशय तुन पूरा कीयालासि हन्नि-मन्नि जीवा इंजोरे लड़ेमायाना किरिया कीत्ता.

हत्ता वर्ष समन्वय कमेटी हीत्ता कार्यभारकुन पोयसी साल मेंड कीत्ता कामकु, अविना संगे हासिल कीत्ता नतीजा किन तना संदेश ते समन्वय कमेटी उल्लेख कीत्ता.

समन्वय कमेटी लोहता संदेश ते दुनिया वेंडे देश ता राजनीतिक परिस्थिति बारेम ते वेहता. जनता पोरो आधारसि गोरिल्ला युद्ध तुन ताकिकीसोरे, दीर्घकालीन जनयुद्ध ता हरदे, दुनिया, देश ता अनुकूल परिस्थिति किन उपयोग कीसोरे जीडमुड आता इंदाना प्रेरणा तुन अफगानिस्तान तिना अमेरिका ता वापसी तल एताना इंजि वेहता. देश ता आदिवासी बहुल इलाकांग ने मंदना प्राकृतिक संपत्ति वेंडे संसाधनकुन लूटी कीयना सरकारी योजनांगना खिलाफ ते, अविना अमल मैदे

तासता पुलिस कैंपकुना, रोटिना खिलाफ ते जोर-शोर ते ताकाना जन आंदोलन किन जनताना सरकारकु नगडल इका ज्यादा मदद एवि कीयना जरूरत तुन वेहता.

देश ता शासक वर्गतोर जनताना राज्यसत्ता तुन वेंडे क्रांतिकारी आंदोलन तुन मापनीकि 2022 टारगेट वाटतोर. अदिन मैदे समाधान-प्रहार हमलाउ किन तेज कीया मुंतोर. दूसरा सेप्पा दुनिया ता माओवादी ताकतकु, मजदूर वर्ग भारत ता जनयुद्ध ता समर्थन ते, समाधान-प्रहार हमलाउ ना खिलाफ ते दुनिया मेंड प्रचार-आंदोलन कीयामंता. 24 नवंबर ते 27 देशकुना जनता दुनिया ता कार्याचरण दिवस मानेमत्ता. ई लेहकटा परिस्थिति लोपा जनताना सरकारकु मजबूत आसोरे, ज्यादा जिम्मेदारी संगे जन आंदोलनकु, जन प्रतिरोध वेंडे जनयुद्ध लोपा जनताना सक्रिय भागीदारी तुन पेरसि कीसोरे जनाधार तुन पेरसि कीयना. दुश्मन ना समाधान-प्रहार हमलाउ किन मुकाबला कीसोरे हड़ा कीयानोंकि परतचोन कोशिश कीयना. दंडकारण्य ता आंदोलन ता भाटा स्थिति तुन वेंडना दिशा ते मुन्ने दायानोंकि दोड़ रास्ता कार्यभारकुना अमल पोरो केंद्रीकरण कीयना इंजो समन्वय कमेटी आह्वान हित्ता.

वायाना सालमेंड कीयना कार्यभारकु:

1. कमजोर अत्ता जनताना सरकारकुन मजबूत कीयना, देब्बा तित्ताविन पुनर्निर्माण कीयना. कॉरपेट सेक्युरिटी नडमा जनताना राज्यसत्ता तुन ताकि कीयना. सब्बे जनताना सरकारकुना कामकाज तुन दुश्मन पुनवा अत्यंत गुप्त रूप ते ताकिकीयना.

जनताना सरकारकुना नेतृत्व ते भूमि समतलीकरण वेंडे सिंचाई विकसित कीसोरे जनताना कृषि उत्पादन तुन पेरसि कीयना ठोस योजना बना कीसि ताना पोरो अमल कीयना. साग-सब्जी उत्पादन, पाल उत्पादन पेरसि कीयना पोरो केंद्रीकरण कीयना.

2. जन आंदोलनकु, जन प्रतिरोध, जनयुद्ध लोपा जनताना, मिलिशिया ना भागीदारी तुन पेरसि कीसोरे जनआधार तुन मजबूत कीयना. दुश्मन ना समाधान-प्रहार हमलाउ नगडल बचेमायना हिसाब ते जनताना सरकारकुना नेतालोर, कार्यकर्तालोरकिन बचाव-हमला ता दांव-पेंच एतानोंकि, अमल कीयानोंकि शिक्षित कीयना.

3. नाहकुने वायना बदलाव किन समझेमासोरे वर्ग संघर्ष तुन लगातार ताकि कीयना. दुश्मन ना मुखबिरतंत्र वेंडे कोवर्टंत्र तुन बेस्केटास्के चिहिनित

कीसोरे ध्वस्त कीयानोंकि वेंडे नियंत्रित कीयानोंकि ताना खिलाफ ते राजनीतिक, सैनिक अभियान एतसोरे कोशिश कीयना.

4. आदिवासी अस्तित्व, अस्मिता, आत्मसम्मान, जनताना जनवादी राज्यसत्ता मैदे, नरसंहारकुन, विस्थापन, पुलिस कैंपकु, रोटिना खिलाफ ते ताकना जन आंदोलनकुन परतचोन मदद एवि कीसोरे अव आंदोलनकुन समन्वय कीयना, मजबूत कीयना लोपा जनताना सरकारकुना, जनताना भागीदारी वेंडे जिम्मेदारी तुन पेरसि कीयना.

5. आदिवासी विरोधी छत्तीसगढ़ भूअर्जन, पुनर्वास एवं पुनर्व्यवस्थापन कानून, 2019, वनाधिकार पट्टा हिलवोरकिन तमा नेलि तिंचि पूडना सुप्रीम कोर्ट ता आदिवासी विरोधी फैसला ता खिलाफ ते, माड पर्यावास अधिकार पोरोय ते ताकना राजस्व सर्वेक्षण खिलाफ ते, माड नेलि तुन भारतीय सेना तुहक् सौपे कीयना समझौता खिलाफ ते, माड पोरो सैन्य अड्डा बना कीयना साजिश खिलाफ ते जन आंदोलनकुन विस्तार कीयना.

6. ब्राह्मणीय हिंदुत्व फासीवादी हमलांग ना खिलाफ ते दलित, मुसलमान, ईसाई, आदिवासी, महिलांग किन गोलबंद कीयना.

7. दंडकारण्य ते साम्राज्यवाद, दलाल नौकरशाही पूंजीपति ओसो सामंती विरोधी वर्ग संघर्ष ओसो जनयुद्ध तुन तेज कीयना लोपा जनताना भागीदारी तुन पेरसि कीसोरे प्रतिक्रांतिकारी रणनीतिक 'समाधान' योजना ता प्रहार हमलाउ किन हरा कीयना.

8. जनयुद्ध तुन तेज कीयानोंकि, दुश्मन ना समाधान-प्रहार हमलाउ किन हड़ा कीयानोंकि पीएलजीए ते बिडिया संख्या ते लेया, लेयोर किन भर्ती कीयना.

9. जनताना सरकारकुने महिला नेतृत्व तुन विकसित कीयना.

10. अपमानजनक, गुलामी वेंडे गद्दारी ता आत्मसमर्पण नीति तुन लात हीयाना, इज्जत ते बत्काना मैदे लड़ेमायाना.

11. मोदी ना आजादी ता अमृत महोत्सव ता ढोंग तुन पर्दाफाश कीयना. ओना पूना भारत ता असली रूप - ब्राह्मणीय हिंदुत्व फासीवादी भारत ता परिकल्पना ता खिलाफ ते व्यापक प्रचार-आंदोलन तुन ताकि कीयना नवजनवादी भारत मैदे लड़ेमायाना. ☉

- नवजनवादी क्रांति जिंदाबाद!

- क्रांतिकारी जनताना सरकार जिंदाबाद!

एक साल तिना जारी सिलंगेर मूलवासी जन आंदोलन किन जय-जयकार!

सिलंगेर ते पूना पुलिस कैंप, सड़क, नरसंहार ता विरोध ते हत्ता साल मेंड तिन्ना ताकना मूलवासी जन आंदोलन किन, आंदोलन तुन तमा बत्काड़ ता हिस्सा बना कित्ता बस्तर जनता किन दंडकारण्य जोन जनताना सरकार समन्वय कमेटी जय-जयकार वेहतामुंता. आंदोलन किन जारी तासना इंजो आह्वान हीसोरेने भरपूर समर्थन ता घोषणा कियामुंता.

सिलंगेर आंदोलन वेंडे नरसंहार किन एक साल निंडता मौका ते 15 तिना 17 मई एवना तीन दिन ता बिडिया आयोजन तुन मूलवासी बचाओ मंच ताकिकीत्ता. नरसंहार जागा ते जन शहीदीरा एजा ते स्मारक अनावरण कीत्तोर. इद् आयोजन ते 45 हजार 8 सौ 3 मूल शामिल अत्तोर इंजि मंच घोषणा कीत्ता. इद् आयोजन ते राज्य एवं देश मेंड तल अखबारकुना, वेडे टीवी चैनलकुना पत्रकारलोर नरगे मूल शामिल अत्तोर. शहीद लोरकिन जोहार वेहसी सिलंगेर आंदोलन तुन जारी तासना, मजबूत कीयाना वेंडे विस्तार कीयाना इंजि किरिया कीत्तोर. इद् सभा ते पूर्व

विरोधी मंच, दिल्ली ता नेतलोर, इंका वेंडे नरगे मूल शामिल आसि सिलंगेर मूलवासी जन आंदोलन किन मदद वेहतोर. बस्तर संभाग ते ताकना सब्बे आंदोलनकुना नेतालोर वेंडे शामिल अत्तोर. इद् आयोजन तुन कव्हर कीयानोंकि छत्तीसगढ़ वेंडे राष्ट्रीय मीडिया ता पत्रकारलोर नरगे मूल शामिल अत्तोर. सभा ते आंदोलन ता इतिहास ता फोटो प्रदर्शनी तास्तोर. फोटो पुस्तक, बस्तर संभाग ते ताकना जन आंदोलनकुना रिपोर्ट संबंधी किताब, वीडियो कुन आविष्कार कित्तोर.

इद् सभा ते छत्तीसगढ़ सरकार तुरंत मूल पेसा

सिलंगेर पहली बरसी का आयोजन!



केंद्रीय मंत्री अरविंद नेताम, सीपीआई ता मनीष कुंजाम, सीपीआईएम ता संजय पराते, दिल्ली विश्वविद्यालय ता प्रोफेसर डॉक्टर सरोज गिरी, सामाजिक कार्यकर्ता बेला भाटिया, छत्तीसगढ़ सर्वआदिवासी समाज ता उपध्यक्ष सुरजु टेकाम, राजनांदगांव किसान संगठन अध्यक्ष सुदीप टीकाम, वेच्चाघाट मूलवासी जन आंदोलन ता सचिव मैनी कचलामी, कारपोरेटीकरण वेंडे सैन्यकरण

कानून अमल कीयाना; बस्तर ते नरसंहार बंद आयाना, बस्तर ते झूठी मुठभेड़ हत्या बंद कीयाना, महिलाना पोरो अत्याचार वेंडे हत्या बंद आयाना, बस्तर तिना गुल्लय पुलिस कैंप किन वापस ओयाना, नरसंहारकिना दोषि अधिकारीर, जवानलोर, डीआरजी गुंडालोरकिन सजा हीयाना, बस्तर जनताना पोरो हवाई बमबारी बंद कीयाना इंजो मोयल गुडरुरम लेहकटा नारा हित्तोर. ©